



HIDAYA
— LEARNING ACADEMY —

ISLAMSKI ODGOJ

DRUGI STEPEN



AKADEMIJA ISLAMA

Akademija islama

PREDMET:
ISLAMSKI ODGOJ
Drugi stepen

Sarajevo, 2025.

AKADEMIJA ISLAMA

PREDMET

Islamski odgoj

LEKTURA I KOREKTURA

Damir Muharemović

STEPEN

Drugi

DTP

Fahrudin Smailović

AUTOR

Grupa autora

DIZAJN KORICA

B.dizajn

UREDNICI

Dr. Elvedin Pezić
Mr. Mirnes Škrijelj

IZDAVAČ

Hidaya Learning Academy

STRUČNI SARADNICI

Dr. Hakija Kanurić
Mr. Haris Hećimović
Abdullah Nasup
Merjem Kanurić



PREDGOVOR

Hvala Allahu, Gospodaru svjetova, i neka su salavati i selami na posljednjeg Allahovog poslanika Muhammeda, sallallahu alejhi ve sellem, na njegovu časnu porodicu, ashabe i sve one koji ga slijede do Sudnjeg dana.

Islam pridaje izuzetnu važnost stjecanju i širenju korisnog znanja kao jednoj od osnovnih potreba muslimana u životu. Znanje je ključ uspjeha u vjerskim i dunjalučkim pitanjima, a Uzvišeni Allah nas podsjeća na njegovu vrijednost riječima:

“Allah će na visoke stepene uzdići one među vama koji vjeruju i kojima je dato znanje.” (El-Mudžadela, 11)

Poslanik, sallallahu alejhi ve sellem, kazao je: “Ko krene putem traženja znanja, Allah će mu olakšati put do dženneta.” (Muslim)

Imajući u vidu ove upute, Hiday Learning Academy predano radi na olakšavanju pristupa šerijatskom znanju putem stručno osmišljenih i pripremljenih udžbenika.

Osnovna misija Akademije islama, koja djeluje u okviru Hiday Learning Academy, jeste prenošenje islamskog znanja na pristupačan, savremen i na autentičnim izvorima islama utemeljen način, s ciljem širenja korisnog znanja, njegove primjene u svakodnevnom životu i izgradnje muslimanske ličnosti kao korisnog i odgovornog člana društva i zajednice.

Akademija islama ima za cilj pružiti osnovno obrazovanje za početnike i napredne učenike, širiti tradicionalno islamsko znanje, promovirati moral i islamske vrijednosti, unaprijediti dostupnost znanja kroz savremene metode učenja, poticati praktičnu primjenu islamskih principa u svakodnevici i promovirati međumuslimansku toleranciju i umjereno razumijevanje islama, odbacujući sve oblike ekstremnih i destruktivnih ideologija.



Naša nastojanja oslanjaju se na tradicionalne islamske principe u kombinaciji sa savremenim metodama edukacije, s ciljem postizanja dobrobiti za pojedinca i društvo u cjelini.

Molimo Allaha, džellešanuhu, da podari bereket i uspjeh u našem radu i da svima koji uče iz ovih djela omogući da budu od koristi sebi i drugima.

Hidaya Learning Academy

UVOD

Zahvala pripada Allahu, Gospodaru svjetova, Koji srca Svojih robova nadahnjuje svjetlom upute i ljubavlju prema dobru. Neka su salavat i selam na Allahovog poslanika Muhammeda, sallallahu alejhi ve sellem, koji je poslan kao odgajatelj srca i vodič ka savršenom moralu, te na njegovu časnu porodicu, ashabe i sve one koji ga slijede do Sudnjeg dana.

Pred vama je udžbenik islamskog odgoja za drugi stepen Akademije islama, u kojem se akcent stavlja na djela srca, što je srž duhovne izgradnje i temelj iskrenog odnosa prema Allahu i ljudima.

Kroz teme poput iskrenosti (ihlase), bogobojažnosti, nade u Allahovu milost, oslonca na Njega (tevekkula), strpljenja (sabura) i samoobračuna, studenti se podstiču na pročišćenje srca, jačanje imana i izgradnju svijesti o Allahu u svakom aspektu života.

Cilj ovog udžbenika nije samo prenošenje informacija već odgajanje vjernika koji razumiju sebe, znaju svoje slabosti i snagu, te koji stalnim trudom i iskrenom namjerom teže Allahovom zadovoljstvu. Unutarnji odgoj neraskidivo je vezan za vanjsku praksu islama i samo čistim srcem moguće je doista biti ustrajan na Pravom putu.

Neka Allah učini da znanje koje stječemo bude korisno, da nam srca otvori za Njegovu uputu i da nas učvrsti u pokornosti Njemu sve do posljednjeg daha.

DJELA SRCA

Hvala Allahu Koji je rekao: “O vi koji vjerujete, Allaha se bojte i tražite ono što će vas Njemu približiti, i na putu Njegovu se borite da biste uspjeli.” (El-Maida, 35)

Neka su salavat i selam na Allahovog Poslanika, sallallahu alejhi ve sellem, koji je rekao: “Tako mi Allaha, ja sam najbogobojazniji među vama i najviše Ga se bojim.” (Buhari i Muslim)

Mi muslimani smo u teškom vremenu i stanju, gdje nam je prijeko potrebna iskrenost, ispitivanje naših srca i namjera kako bismo popravili situaciju i izašli iz ovog iskušenja. Veliki su islamski projekti propali zbog neiskrenosti, licemjerstva i loših namjera.

Iz tog razloga, ovaj nivo obrazovanja fokusira se na djela srca, koja su temelj svih postupaka i osnova za prihvatanje ili odbacivanje djela na Sudnjem danu kako bi nam pomogla u činjenju dobra bez unutrašnjih prepreka koje ometaju naše djelovanje.

Predmet Islamski odgoj obrađuje najbitnije teme i ono što uputa Allahovog Poslanika, sallallahu alejhi ve sellem, suštinski znači. On crpi smjernice iz svih drugih islamskih disciplina: tefsira, hadisa, akaida, sire, pa i fikha.

Djela srca donose velike koristi na ovom i budućem svijetu, i tajna su uspjeha u svim poslovima. Ljudi koji posjeduju čista srca uvijek su sretni, produktivni i poznati po dobroti. Ibn Ebi Džemre, rahimehullah, rekao je: “Volio bih da među učenjacima ima onih koji su posvećeni isključivo podučavanju ljudi o njihovim namjerama, govoreći samo o djelima srca.”

Pored iskrenosti prema Uzvišenom Allahu, oslanjanje na Njega osnažuje ambicije i želju za radom za islam. Kada se oslonimo na Allaha, postići ćemo unutrašnji mir i spokoj, nastavljajući svoj rad, koristeći se uzrocima koji vode ka uspjehu, izbjegavajući lijenost, nagađanja i praznovjerja.



Razmišljanje i preispitivanje vlastitih postupaka također su djela srca koja stimuliraju aktivnost i djelovanje, olakšavaju planiranje, postavljanje ciljeva, korigovanje pravca kretanja i usavršavanje djela.

Ibn Kajjim, rahimehullah, kaže: “Nada je vodič koji vodi čovjeka na njegovom putu ka Allahu, uljepšava mu putovanje, potiče ga i bodri na ustrajnost. Bez nade, niko ne bi krenuo, jer strah sam po sebi ne pokreće čovjeka, već ga pokreće ljubav; strah ga uznemirava, a nada vodi.”

Može se dogoditi da srce osjeti neku nadu u ljude, što je mana od koje se teško može potpuno sačuvati. Kada se izjednači nada u Allaha Uzvišenog s nadom u stvorenja, zapada se u širk i napušta lađa spasa. Međutim, kada se prednost dadne Allahovom zadovoljstvu nad zadovoljstvom bilo koga drugog, uspjeh je zagarantovan, kao i napredak u životu i radu.

Jedan od faktora koji pomažu u produktivnosti i činjenju dobra jeste zadovoljstvo Allahom Uzvišenim, zadovoljstvo islamom i poslanstvom Muhammeda, sallallahu alejhi ve sellem. Onaj ko svoje obaveze ispunjava radosnim srcem nadmašuje onog prisiljenog u produktivnosti, ubire više plodova, a njegovo djelo biva blagoslovljeno. S obzirom na to da je duša sklona zlu, to je i jedna od najvažnijih prepreka koje ometaju rad, produktivnost, istrajnost i kvalitet, Uzvišeni Allah nam naređuje da čistimo svoje duše, odbacimo strasti i samoobračunavamo se. Samoobračun je od najvažnijih djela srca na koje treba obratiti pažnju, posebno u vremenu mnoštva stvari koje nas okupiraju i odvraćaju od produktivnosti.

U ovom savremenom dobu, naši dani slični su danima strpljenja o kojima je govorio Poslanik, sallallahu alejhi ve sellem, u kojima je život ispunjen teškoćama, mnogim kradljivcima vremena, iskušenjima u vjeri, uzburkanim strastima i duboko ukorijenjenim sumnjama. Stoga nema većeg i obuhvatnijeg dara od strpljenja. Strpljenjem se suprotstavljamo preprekama i ne dozvoljavamo da nas zaokupe ili oslabe, već nastavljamo svoj put s jasnim uvjerenjem, strpljivošću, oslanjajući se na Allaha Uzvišenog.

Na taj način čovjek osjeća duboku potrebu za izučavanjem djela srca, koja ga vode kroz vjeru i dunjaluk, sve dok ne postigne ono što Allah od Svojih robova traži onako kako On to želi.

A Uzvišenog Allaha molimo da nam podari uspjeh i uputu.



Djela srca

1. Iskrenost (*ihlas*)
2. Bogobojaznost (*takva*)
3. Strah (*havf*)
4. Nada (*redža*)
5. Ljubav (*mehabba*)
6. Strpljenje (*sabr*)
7. Zahvalnost (*šukr*)
8. Opreznost u vjeri (*vera'*)
9. Zadovoljstvo (*rida*)
10. Razmišljanje (*tefekkur*)
11. Samoobračun (*muhasaba*)
12. Oslanjanje na Allaha (*tevekkul*)

Rezime

Djela srca temelj su uspjeha i na dunjaluku i na ahiretu. Ona su baza koja daje snagu svim drugim djelima. Naš Poslanik, sallallahu alejhi ve sellem, savršen je primjer djela srca – kroz njegov odnos prema Allahu, prema ljudima, životinjama, pa čak i prema neživoj prirodi.

Rekao je: “Najbolji od vas je onaj ko je najbolji prema drugim ljudima.” U drugoj predaji stoji: “Najbolji od vas je onaj ko je najbolji prema stvorenjima.”

Naša misija je da kroz izučavanje ovih tema – iskrenosti, bogobojaznosti, straha, nade, ljubavi, strpljenja, zahvalnosti, zadovoljstva, razmišljanja, samooobračuna i tevekkula – izgradimo svoja srca i duše kako bismo bili bolji vjernici i bolji ljudi.

Molimo Allaha, Gospodara svjetova, da nam u tome pomogne, da nam podari iskrenost, strpljenje i ljubav, te da nas učini od onih kojima je On zadovoljan i koji su zadovoljni Njime.

ISKRENOST (IHLAS)

Iskrenost je srž i suština ibadeta, temelj na osnovu kojeg se djela primaju ili odbacuju. To je najvažnije i najuzvišenije djelo srca, ključno u pozivu poslanika, alejhimu selam, kako Uzvišeni kaže: "A naređeno im je da samo Allahu ibadet čine, da Mu iskreno, kao pravovjerni, vjeru ispovijedaju." (El-Bejjina, 5)

Također, Uzvišeni kaže: "Zar ne, čista vjera pripada samo Allahu." (Ez-Zumer, 3) Zbog svega ovoga od ključne je važnosti da započnemo govorom o iskrenosti.

Jezička definicija iskrenosti

Kaže se *ahlese eš-šej'*, što znači učiniti nešto čistim i ne pomiješati ga s nečim drugim. Uzvišeni Allah kaže: "Ono što iz njene utrobe dolazi, što nastaje između grizina i krvi; mlijeko je to, čisto (*halisan*) i ukusno onima koji ga piju." (En-Nahl, 66)

Šerijatskoterminološka definicija iskrenosti

Ibn Kajjim kaže da je iskrenost kada dobro djelo bude učinjeno isključivo i jedino radi Svevišnjeg Allaha. Drugi su kazali da je iskrenost ne tražiti svjedoka za svoja djela osim Allaha, niti očekivati nagradu za učinjeno osim od Njega.

Pjesnik kaže:

*Ako djelo tvoje nije radi Allaha iskreno,
sve što gradiš, propast će, to je sigurno.*

*Iskrenost je temelj onda kad je djelo
u skladu sa Kur'anom i sunnetom učinjeno.*

Iskrenost je uvjet primanja djela

Uzvišeni Allah naredio je Svojim robovima iskrenost na mnogim mjestima u Svojoj Knjizi, što ukazuje na njenu obaveznost i važnost, te da je iskrenost uvjet da bi djelo bilo primljeno. Uzvišeni kaže: "A naređeno im je da samo Allahu ibadet čine, da Mu iskreno, kao pravovjerni, vjeru ispovijedaju." (El-Bejjina, 5)



Važnost nijeta / namjere

Osnova svih djela je namjera; čovjek će biti nagrađen i proživljen prema namjeri.

Od Omera b. Hattaba, radijallahu anhu, prenosi se da je Allahov Poslanik, sallallahu alejhi ve sellem, rekao: "Zaista su djela prema namjerama, i svakome pripada ono što naumi." (muttefekun alejhi)

Jahja b. Ebi Kesir, rahimehullah, kazao je: "Učite o namjerama, jer su one dalekosežnije od samih djela."

Plodovi iskrenosti

1. Primanje djela kod Allaha

Od plodova iskrenosti jeste primanje djela. Poslanik, sallallahu alejhi ve sellem, kaže: "Allah prima samo djelo koje se učini iskreno radi Njega i kojim se traži Njegovo lice." (Nesai; vjerodostojan po ocjeni Albanija)

2. Postizanje i udvostručenje nagrade

Poslanik, sallallahu alejhi ve sellem, kaže: "Nećeš potrošiti nijedan dinar a da nećeš biti nagrađen za to, ukoliko si to učinio radi Allahovog lica." (muttefekun alejhi)

Rekao je Ibn Mubarek, rahimehullah: "Namjera može uvećati malo djelo, ali isto tako može umanjiti veliko djelo."

Zubejd el-Jami, rahimehullah, kaže: "Volim da imam namjeru u svemu, čak i u jelu i piću."

3. Stjecanje nagrade čak i ako nismo u stanju izvršiti djelo

Enes b. Malik, radijallahu anhu, prenosi da je Poslanik, sallallahu alejhi ve sellem, rekao: "Doista ima ljudi u Medini, nismo prošli nijedan uspon niti dolinu a da nisu bili s nama, zadržali su ih opravdani razlozi." (muttefekun alejhi) U Muslimovoj verziji stoji: "Oni imaju učešća u nagradi, zajedno s vama."

Isto tako, siromašan čovjek može zaslužiti nagradu kao bogat koji daje sadaku iz svog imetka ukoliko ima čistu i ispravnu namjeru. Ebu Kebš el-Ensari, radijallahu anhu, prenosi od Poslanika, sallallahu alejhi ve sellem, da je kazao: "Primjer ovog ummeta je kao primjer četiri osobe: čovjeka



kojem je Allah dao imetak i znanje, pa on upravlja svojim imetkom i troši ga u pravu svrhu; čovjeka kojem je Allah dao znanje, ali nije dao imetak, pa on kaže: 'Kad bih imao poput ovog, radio bih kao on.' – ova dvojica su u nagradi isti; čovjeka kome je Allah dao imetak, a nije mu dao znanje, pa se on nepromišljeno razbacuje tim imetkom, ne boji se svoga Gospodara – ovaj je na najgorem stepenu kod Allaha; i čovjeka kojem Allah nije dao ni imetak ni znanje, pa on kaže: 'Kad bih imao imetka, radio bih kao što taj i taj radi.' On će biti osuđen prema svojoj namjeri i grijeh njih dvojice jednak je." (Ahmed i Ibn Madže; vjerodostojan po ocjeni Albanija)

4. Spas od vatre

Uzvišeni kaže: "A od nje će odstranjen biti onaj najbogobojazniji, onaj koji bude dio imetka svoga udjeljivao da bi se očistio, ne očekujući da mu se zahvalnošću uzvrati, već jedino žudeći za licem Gospodara svoga Svevišnjeg, i on će, zbilja, zadovoljan biti!" (El-Lejl, 17-21)

Posljedice izostajanja iskrenosti

1. Neprihvaćena djela

Ako djelo nije urađeno iskreno i isključivo u ime Allaha, neće biti primljeno, a onaj ko ga čini, bit će prepušten onome u čije ime ga je uradio.

Ebu Hurejre, radijallahu anhu, prenosi da je Poslanik, sallallahu alejhi ve sellem, rekao: "Allah Uzvišeni je rekao: 'Ja sam najnezavisniji od onoga što Mi se pridružuje, pa ko uradi neko djelo radi Mene i u njemu Mi pridruži drugog, ja ću to djelo odbaciti i prepustiti onome koga Mi je pridružio.'" (Muslim)

2. Ulazak u Vatru na Sudnjem danu

Ebu Hurejre, radijallahu anhu, prenosi: "Poslanik, sallallahu alejhi ve sellem, udario me po koljenima i rekao: 'Ebu Hurejre, to su prva trojica kojima će biti potpaljena Vatra na Sudnjem danu', misleći na one koji su se borili, učili i podučavali te dijelili svoj imetak iz licemjerstva i radi reputacije." (Tirmizi)

ZNACI ISKRENOSTI

1. Izbjegavanje želje za slavom i pohvalom

Učenjaci su upućivali dovu Allahu da ih učini nepoznatim na Zemlji, a poznatim na nebesima.

2. Strast za radom i iniciranjem dobrih djela u ime Allaha
3. Strpljivost i izdržljivost bez žaljenja
4. Želja za činjenjem djela u tajnosti, tj. da djela koja se čine tajno budu veća i brojnija od javnih

Fudajl, rahimehullah, kaže: "Allah, džellešanuhu, od tebe želi tvoju namjeru i tvoje htijenje."

Sve ovo spada u znakove iskrenosti. Stoga bi musliman trebao povesti računa i pripaziti da mu u svakom djelu namjera bude čista radi Allaha, bez traženja pohvale ili priznanja od ljudi.

Zejn el-Abidin Ali b. Husejn, rahimehullah, bio je poznat po tome što je noću nosio hljeb na leđima, prateći u njenim tminama siromahe, govoreći: "Sadaka u tminama noći gasi gnjev Gospodara." Pojedini ljudi iz Medine nisu znali odakle im dolazi opskrba od koje žive. Kada je umro Ali b. Husejn, primijetili su da su nestali oni darovi koje su primali noću, a na njegovim leđima uočili su tragove koje su ostavile vreće sa hljebom, koje je nosio po noći. Izdržavao je stotinu porodica.

Spajanje dunjalučkih koristi s ibadetima

To znači da čovjek može obaviti neki vjerski čin, a s njim imati i neku legitimnu ovosvjetsku namjeru, uz istovremenu želju da postigne Allahovo zadovoljstvo. Naprimjer, ako posti radi Allahovog zadovoljstva, a uz to ima namjeru da sačuva svoje zdravlje; ako putuje na hadž radi Allahova zadovoljstva, a istovremeno ima i poslovnu namjeru; ili ako se bori na Allahovom putu s namjerom da stekne plijen kako bi prehranio svoju porodicu. Također, ako



ide prema džamiji s namjerom da se približi Allahu, a istovremeno uživa u fizičkoj aktivnosti.

Ovo neće poništiti urađena djela, ali može umanjiti njihovu nagradu u zavisnosti od toga koliko je srce sklono ovosvjetskim interesima. Najbolje je u djelovanju imati samo jednu namjeru: približiti se Allahu, a sve drugo je sekundarno i dođe usput. Međutim, u vremenu u kojem živimo potrebno je smoći snage i objediniti eventualne dunjalučke koristi namjeravajući da i one prerastu u ahiretske. Naprimjer, ako odlaskom na hadž usput možemo ostvariti i neku zaradu trgovinom, nijetiti ćemo da nas ta zarada učini dobročiniteljima i pomagačima drugim muslimanima.

Bitno je znati da iskren nijet može radnje koje su adet pretvoriti u ibadet. Naprimjer, ukoliko se želimo istuširati radi rashlađivanja tijela ili uklanjanja znoja i nečistoće, što je inače adet, nijetom to kupanje može biti gusul, što je kupanje ibadeta, te da na taj način steknemo nagradu tog ibadeta.

Rija' (pretvaranje)

Riječ *rija'* na arapskom jeziku dolazi iz korijena *ra'a*, što znači činiti nešto kako bi to ljudi vidjeli.

To je loša osobina i jedna od karakteristika licemjera, što je spomenuo Uzvišeni Allah: "Licemjeri, zaista, nastoje prevariti Allaha, a On će njih nadmudriti. Kada ustaju da namaz obavljaju, lijeno se dižu i prikazuju se svijetu, a Allaha samo malo spominju." (En-Nisa, 142)

Prenosi se od Ebu Seida, radijallahu anhu, da je rekao: "Jedne prilike do nas je došao Poslanik, sallallahu alejhi ve sellem, dok smo razgovarali o Mesihu Dedžalu, pa je rekao: 'Želite li da vas obavijestim o nečemu što je za mene opasnije od Mesiha Dedžala?' Rekli smo: 'Da, naravno.' On je rekao: 'To je skriveni širk. Kada čovjek ustane da klanja i ukrasi svoj namaz zato što primijeti da ga neko gleda.'" (Ibn Madže; vjerodostojan po ocjeni Albanija)

Poslanik, sallallahu alejhi ve sellem, također je rekao: "Najviše se bojim za vas malog širka." Upitali su: "A šta je mali širk, Allahov Poslaniče?" On je rekao: "Rija' (tj. pretvaranje). Kada ljudi na Sudnjem danu budu pitani za svoja djela, Allah će reći onima koji su se pretvarali: 'Idite onima radi kojih



ste ta djela činili na dunjaluku, pogledajte da li ćete kod njih naći nagradu.” (Ahmed; vjerodostojan po ocjeni Abdulkadira Arnauta)

Djela za koja se misli da su pretvaranje (rija’), a nisu

1. Ako čovjek obavlja određeno djelo za sebe, a ljudi ga pohvale zbog toga. Jednom su pitali Poslanika, sallallahu alejhi ve sellem: “Allahov Poslaniče, ako čovjek nešto radi za sebe, a ljudi to vole i hvale?” Poslanik je, sallallahu alejhi ve sellem, odgovorio: “To je ovozemaljska radost za vjernika.” (Ibn Hibban, a osnovu ovog hadisa bilježi i Muslim)
2. Stjecanje ugleda i slave bez namjere za tim, kao što je slučaj s učenjakom ili učenikom koji podučava ljude o vjeri i daje fetve, rješavajući nejasnoće. Takvi mogu steći slavu, ali ne treba ih spriječiti da čine dobro to što postoji bojazan od rijaluka, već trebaju nastaviti na svom putu sa čistom namjerom i iskrenim nijetom, boreći se da očuvaju iskrenost.
3. Neki ljudi mogu vidjeti pobožnog i vrijednog čovjeka koji se trudi u ibadetu, pa postanu motivirani da i sami budu aktivni u ibadetu, što ne spada u zabranjeni rija’. Ako njihov cilj u ibadetu bude samo Allahovo zadovoljstvo, oni će biti nagrađeni.
4. Uljepšavanje odjeće, obuće i lijep miris nisu oblik rijaluka.
5. Skrivanje grijeha i nepričanje o njima nije rija’. Naprotiv, od nas se traži da skrivamo svoje grijeha i da ne pričamo o njima, a neki ljudi misle da je nužno govoriti o svojim grijesima kako bi bili iskreni, što je zabluda i šejtanova podvala. Otkrivanje grijeha može dovesti do širenja poroka među vjernicima.

Kada je pokazivanje i isticanje djela dozvoljeno, a kada nije?

Pokazivanje i skrivanje djela ogledaju se kroz tri situacije:

- Ako je od sunneta da se djelo sakrije, treba ga sakriti, kao što je slučaj s noćnim namazom i poniznošću u ibadetu.
- Ako je od sunneta da se djelo pokaže, treba ga pokazati, poput redovnog obavljanja džume i namaza u džematu te javnog iznošenja istine.
- Ako je djelo između skrivanja i pokazivanja, preporučuje se da ga sakrije onaj koji se boji da bi mogao upasti u rijaluk, dok se preporučuje da ga



obznani onaj koji želi da drugi slijede njegov primjer, kao što je slučaj s dobrovoljnom sadakom. Ako neko misli da bi mogao upasti u rijaluk ukoliko ljudi vide da dijeli sadaku, trebao bi sakriti tu sadaku. Međutim, ako smatra da će ljudi slijediti njegov primjer i da će se on truditi da očisti svoj nijet od pretvaranja, tada je bolje da je pokaže.

BOGOBOJAZNOST (TAKVA)

Bogobojaznost je najbolja opskrba za ahiret, kao što Allah Uzvišeni kaže: “Za put se opskrbite, a najbolja je opskrba bogobojaznost! I Mene se bojte – vi, razumom obdareni!” (El-Bekare, 197) Bogobojaznost je, također, mjerilo po kojem se ljudi vrednuju, kako Uzvišeni kaže: “Najugledniji od vas kod Allaha je onaj koji Ga se najviše boji; Allah je, uistinu, Onaj Koji sve i u potpunosti zna.” (El-Hudžurat, 13) Isto tako, bogobojaznost je saputnik u samoći, spas od kazne i put do dženneta.

Zbog njene počasti i vrline, Allah je naredio da se pomažemo u postizanju bogobojaznosti: “Potpomažite se u dobročinstvu i bogobojaznosti.” (El-Maida, 2), jer je ona put ka Allahovom zadovoljstvu.

Allahov Poslanik, sallallahu alejhi ve sellem, rekao je: “Bogobojaznost je ovdje (pokazujući prstom na svoja prsa, odnosno srce).” (Buhari i Muslim)

Jezička i terminološka definicija

Bogobojaznost u jeziku znači zaštita, a šerijatskoterminološko značenje bogobojaznosti je postaviti prepreku između sebe i grijeha.

To znači da se čovjek neće nalaziti tamo gdje mu je Uzvišeni Allah zabranio niti će izostajati tamo gdje mu je naređeno da bude. Ako ti je Allah zabranio da sjediš u društvu gdje se negiraju Allahovi ajeti i gdje se s njima izruguje, na takvim mjestima nemoj biti. Ako ti je naredio da ideš u džamiju radi obavljanja pet dnevnih i džuma-namaza, potrudi se da ne izostaješ.

Jedan je pjesnik rekao:

*Kloni se grijeha, malih i velikih, jer to je bogobojaznost prava,
budi poput onog što po trnju hoda, pazeći gdje nogu stavlja*

*Ne potcjenjuj grijeh, ma koliko malen bio,
jer i planine su od kamenja sitnog.*



Kada je Omer b. Hattab upitao Ubejja b. Ka'ba o bogobožnosti, odgovorio je: "Jesi li ikada išao putem punim trnja?" Omer odgovori: "Da." Ubejj reče: "Šta si tada uradio?" Omer reče: "Pazio sam i trudio se da ne stanem na trnje." Ubejj reče: "To je bogobožnost."

U komentaru riječi Uzvišenog: "O vi koji vjerujete, bojte se Allaha istinskom bogobožnošću" (Alu Imran, 102), Ibn Mesud, radijallahu anhu, kaže: "Istinska bogobožnost podrazumijeva da se Allahu pokoravaš i prema Njemu ne griješiš, da Ga spominješ i ne zaboravljaš, da Mu zahvaljuješ i blagodati ne poričeš."

Oporučivanje bogobožnosti

Uzvišeni Allah naredio je i oporučio bogobožnost na više mjesta u Svojoj Knjizi: "Mi smo onima kojima je data Knjiga prije vas, a i vama, već zapovjedili da se bojite Allaha." (En-Nisa', 131)

Kurtubi kaže: "Naredba za bogobožnost univerzalna je za sve narode." Neki učenjaci smatraju da je ovaj ajet centralna tema cijelog Kur'ana, jer je bogobožnost suština svih njegovih poruka.

Poslanik, sallallahu alejhi ve sellem, poticao je na bogobožnost, pa je Ebu Zerru, radijallahu anhu, rekao: "Boj se Allaha gdje god da si, a nakon lošeg djela učini dobro koje će ga izbrisati. Prema ljudima se ophodi lijepim ponašanjem." (Tirmizi; vjerodostojan po ocjeni Albanija)

Pri rastanku sa svojim ashabima, Poslanik, sallallahu alejhi ve sellem, rekao je: "Oporučujem vam bogobožnost." (Ebu Davud i Tirmizi; vjerodostojan po ocjeni Albanija)

Bogobožnost je put ka Allahovoj blizini

Uzvišeni Allah kaže: "Zaista, za Allahove štićenike nema straha i oni ni za čim ne treba da tuguju, oni koji budu vjerovali i koji se budu Allaha bojali." (Junus, 62-63)

Također kaže: "Allahovi štićenici samo su oni koji Ga se boje, ali većina njih ne zna." (El-Enfal, 34)



Bliskost s Allahom Uzvišenim postiže se dobrim djelima, a ne novotarijama i izmišljenim praksama. Dokaz te bliskosti nije posjedovanje određenog vida nadnaravnosti, naprimjer da čovjek može letjeti u visinu ili hodati po vodi.

Ebu Hurejre, radijallahu anhu, prenosi da je Poslanik, sallallahu alejhi ve sellem, rekao: “Uzvišeni Allah kaže: ‘Ko uznemirava Mog štićenika (evliju),¹ Ja sam mu objavio rat. Najdraže čime Mi se Moj rob može približiti jest ono što sam mu učinio obaveznim, a Moj rob će Mi se ustrajno približavati nafilema, pa ću ga zavoljeti.’” (Buhari)

Upozorenje

Neki ljudi, pozivajući se na bogobožnost, a zbog pretjeranog straha od grijeha, izbjegavaju čak i ono što je bez ikakve sumnje dozvoljeno, misleći da time postižu bogobožnost. Međutim, to je pogrešno, jer time uskraćuju ono što je Allah dozvolio. Nekonzumiranje onoga što je dozvoljeno smatrajući to vidom pobožnosti nije pravi oblik pobožnosti.

Da bi se neko iskreno bojao Allaha Uzvišenog, nužno je da stekne znanje o onome što je Allah objavio Svojim robovima i ne smije to zanemariti. Nema istinske bogobožnosti bez znanja i poslušnosti.

¹ Evlija je čovjek koji je spoznao svoga Stvoritelja i ustrajan je u iskrenoj pokornosti Njemu.

STEPENI BOGOBOJAZNOSTI

Uzvišeni Allah spomenuo je različite stepene i nivoe bogobojaznosti kazavši: “Mi ćemo učiniti da Knjigu poslije naslijede oni Naši robovi koje Mi izaberemo; bit će onih koji će prema sebi nasilje učiniti, bit će onih umjerenih, bit će i onih koji će, Allahovom voljom, u dobrima prednjačiti – za to će veliku blagodat dobiti.” (Fatir, 32)

Dakle, iz navedenog ajeta možemo zaključiti da se bogobojazni dijele na tri stepena:

1. Onaj koji sebi nepravdu čini

To je osoba koja priznaje monoteizam i vjeruje u Poslanika, sallallahu alejhi ve sellem, te ispunjava stubove islama i imana, ali se ne trudi da u potpunosti zaštititi sebe od ulaska u Vatru. Takva osoba zanemaruje neke obaveze i čini određene zabrane. Ona spada među grešnike monoteiste, koji su pod Allahovom voljom: ako On hoće, oprostit će im, a ako hoće, kaznit će ih prema njihovim djelima, sve dok jednog dana ne izađu iz Vatre. Međutim, to ne znači da treba potcjenjivati grijeh. Prenosi se od Abdullaha b. Mesuda, radijallahu anhu, da je Allahov Poslanik, sallallahu alejhi ve sellem, rekao: “Čuvajte se neznatnih grijeha, jer se oni skupljaju kod čovjeka sve dok ga ne unište.” (Ahmed; vjerodostojan po ocjeni Albanija)

2. Umjerena osoba

To je osoba koja se kloni svega što može dovesti do kažnjavanja Vatrom, makar i na kratko vrijeme, ali istovremeno ne žuri da čini dobra djela. Uzvišeni je rekao: “Ako se budete klonili velikih grijeha koji su vam zabranjeni, Mi ćemo pokriti vaša loša djela.” (En-Nisa, 31)

3. Onaj koji se natječe u dobru

Ovo je najviši stepen. To je osoba koja ispunjava svoje obaveze, kloni se zabrana i žuri da čini dobra djela. To ne znači da ne griješi, jer je Poslanik, sallallahu alejhi ve sellem, rekao: “Svi sinovi Ademovi griješe.” (Tirmizi i Ibn Madže; vjerodostojan po ocjeni Albanija)



Uzvišeni, također, kaže: “One koji se klone velikih grijeha i razvrata, a one bezazlene On će oprostiti, jer Gospodar tvoj, zaista, neizmjereno prašta.” (En-Nedžm, 32)

Osobine bogobojažnih

Bogobojažni vjernici imaju posebne osobine prema kojima se mogu prepoznati, a Allah, džellešānuhu, spominje neke od njih:

1. Težnja ka istini u govoru i djelu. Uzvišeni Allah kaže: “A onaj koji donosi Istinu i oni koji u nju vjeruju, oni su bogobojažni.” (Ez-Zumer, 33)
2. Poštivanje Allahovih granica i propisa. Uzvišeni Allah kaže: “Tako je to! Pa ko poštuje Allahova znamenja – znak je to bogobojažnosti srca.” (El-Hadždž, 32) Poštivanje Allahovih znamenja podrazumijeva da osoba poštuje Allahove zabrane i ne krši ih, poštuje Njegove naredbe izvršavajući ih u najboljem obliku.
3. Težnja ka pravdi i pravednom suđenju. Allah Uzvišeni kaže: “Neka vas mržnja koju prema nekim ljudima nosite nikako ne navede da nepravedni budete! Pravedni budite, to je najbliže bogobojažnosti, i bojte se Allaha. Allah, doista, u potpunosti zna ono što činite.” (El-Maida, 8)
4. Slijeđenje stopa poslanika, iskrenih i dobrih ljudi te hodanje njihovim stazama. Uzvišeni Allah kaže: “O vi koji vjerujete, bojte se Allaha i budite s onima koji su iskreni!” (Et-Tevba, 119)

Put ka izgradnji bogobojažnosti

1. Izvršavati naredbe (farzove) koje su propisane kao obligatne dužnosti. To su Allahu najdraža djela kojima gradimo bogobojažnost i trasiramo svoj put ka Allahovoj ljubavi.
2. Kloniti se zabrana (harama) koje je Allah strogo zabranio. Izgraditi prepreku između sebe i grijeha. Ovo je jednako bitno kao i izvršavanje naredbi.
3. Upotpunjavanje sunneta, dosljedno slijedeći našeg učitelja Muhammeda, sallallahu alejhi ve sellem. Najveći je sunnet njegovo ponašanje, ahlak, što je i osnovna tema ovog predmeta, kao i slijeđenje svih njegovih opisnih epiteta kao najboljeg od svih stvorenja.



4. Dova: traženje od Allaha da nas učini bogobojažnim. Put ka bogobojažnosti uključuje čestu dovu, kao što je: "Allahu, podari mojoj duši bogobojažnost, očisti je, jer Ti je najbolje čistiš, Ti si njen vlasnik i nadzornik!"
5. Učenje: Spoznaja Uzvišenog Gospodara kroz lijepa imena i savršena svojstva.
6. Druženje sa dobrim ljudima, Allahu pokornim, prije svih s učenim ljudima koji će nam pomoći u spoznaji Uzvišenog Allaha.
7. Rad na čišćenju srca. Avn b. Abdullah kaže: "Početak bogobojažnosti jeste iskrena namjera."
8. Put ka bogobojažnosti, također, uključuje strpljenje, obračunavanje sa samim sobom, stid, darežljivost, post i konzumiranje halal opskrbe.

Plodovi bogobojažnosti

Sva je dobrota u bogobojažnosti, kao što je rekao Poslanik, sallallahu alejhi ve sellem: "Drži se bogobojažnosti, jer ona je izvor svakog dobra." (Taberani, *El-Kebir*; vjerodostojan po ocjeni Albanija)

Ebu Seid el-Hudri, radijallahu anhu, prenosi da mu je jedan čovjek došao i zatražio od njega savjet. Ebu Seid mu reče: "Pitao si me ono što sam i ja ranije pitao Allahovog Poslanika, sallallahu alejhi ve sellem, pa mi je rekao: 'Oporučujem ti bogobojažnost, jer ona je osnova svega.'" (Ahmed; dobar po ocjeni Albanija)

Najveći plodovi bogobojažnosti

1. Ulazak u džennet i spas od Vatre. Allah, džellešānuhu, kaže: "Dat ćemo da takav džennet naslijedi onaj od robova Naših koji se bude Allaha bojao." (Merjem, 63)

Poslanik, sallallahu alejhi ve sellem, rekao je: "Na dan kada je Allah stvorio nebesa i Zemlju stvorio je stotinu (stepena) milosti. Svaka milost ispunjava prostor između nebesa i Zemlje. Od njih jednu milost je podijelio među stvorenjima, na osnovu koje je majka saosjećajna prema svom djetetu, njome divlje zvijeri i ptice piju vodu, i njome stvorenja međusobno milost i saosjećanje iskazuju. Kada dođe Sudnji dan, ona će biti posebna samo za bogobojažne, te će im podariti i ostalih devedeset i devet (stepeni)." (Hakim, koji ga je ocijenio vjerodostojnim)



2. Ugled kod Allaha. Uzvišeni kaže: "Najugledniji od vas kod Allaha je onaj koji Ga se najviše boji; Allah je, uistinu, Onaj Koji sve i u potpunosti zna." (El-Hudžurat, 13)
3. Sreća na ovom i budućem svijetu. Kazao je Uzvišeni: "Zaista, za Allahove štićenike nema straha i oni ni za čim ne treba da tuguju, oni koji budu vjerovali i koji se budu Allaha bojali, za njih su dobre vijesti i na ovom i na drugom svijetu – Allahove riječi niko ne može izmijeniti – to je, zaista, uspjeh veliki." (Junus, 62-64)
4. Uputa, oprost grijeha i postizanje Allahovih blagodati. Allah, džellešanuhu, kaže: "O vi koji vjerujete, ako se budete Allaha bojali, On će vam ono što istinu od neistine razdvaja dati i preko ružnih postupaka vaših će preći i oprostiti vam. A Allahova je dobrota neizmjenjerna." (El-Enfal, 29)
5. Obilje opskrbe. Kazao je Uzvišeni: "A onome koji se Allaha boji, On će izlaz dati. I opskrbit će ga odakle se i ne nada." (Et-Talak, 2-3)
6. Olakšanje poslova. Kazao je Uzvišeni: "A onome ko se Allaha boji, On će u svemu lahkoću dati." (Et-Talak, 4)
7. Blagoslov i bereket. Kazao je Uzvišeni: "A da su stanovnici naselja vjerovali i bogobojažni bili, Mi bismo im blagoslove i s neba i iz zemlje slali." (El-A'raf, 96)

Jedna žena iz pustinje spoznala je ovu blagodat, pa je savjetovala sina koji je namjeravao putovati: "Savjetujem ti da budeš bogobojažan, jer malo bogobojažnosti donosi ti više koristi nego mnogo tvoje pameti."

8. Zaštita, sigurnost, pobjeda i lijep ishod. Uzvišeni Allah kaže: "Zemlja je, doista, Allahova. On je daje u naslijeđe kome On hoće od robova Svojih; a lijep ishod pripada bogobojažnima." (El-A'raf, 128)

Prenosi se od Ebu Malika el-Agara da je rekao: "Kada je Ebu Bekr, radijallahu anhu, želio imenovati Omera, radijallahu anhu, za svog nasljednika, pozvao ga je i rekao mu: "Pozivam te na stvar koja je teška za onoga ko je bude preuzeo. Boj se Allaha, Omere, iskazujući Mu poslušnost i pokornost, koju ćeš dokazivati svojom bogobojažnošću, jer je bogobojažan čovjek siguran i zaštićen."

9. Nadoknada boljim od onoga što je ostavljeno Allaha radi. Prenosi se od Ebu Katade i Ebu Dehma'a da su rekli: "Došli smo kod jednog čovjeka iz



pustinje, pa nam je on rekao: ‘Allahov Poslanik, sallallahu alejhi ve sellem, uzeo me za ruku i podučio onome što je njega Allah Uzvišeni podučio rekavši: “Nećeš ostaviti nešto iz bogobožnosti Allaha radi, a da ti Allah neće nadomjestiti boljim od toga.”’” (Ahmed; vjerodostojan po ocjeni Arnauta)

Onaj koji požuruje ostvarenje obećanja Uzvišenog Allaha, smatrajući da ono kasni, trebao bi prvobitno sebe preispitati: da li je ostvario bogobožnost i upotpunio je u njenom pravom smislu? Nema sumnje da onaj ko čini određene stvari, a druge izostavlja, i ko izbjegava određene zabrane, a druge čini – nije ostvario potpunu bogobožnost. Treba, dakle, preispitati sam sebe, a zatim se posvetiti bogobožnosti kako bi je dostigao i zaslužio njene plodove.

STRAH (*HAUF*)

Koliko je onih koje je strah oslobodio okova strasti! Koliko je neposlušnih prema svojim roditeljima koje je strah odvratio od nepokornosti! Koliko je Allahovih robova plakalo iz strahopoštovanja prema Njemu! Koliko je putnika ka Allahu pratio strah na njihovom putu! Koliko je onih koji vole Allaha Uzvišenog napojilo zemlju svojim suzama!

Tako mi Allaha, kako je lijep i veličanstven ovaj strah za onoga ko spozna njegovu pravu vrijednost. Allah Uzvišeni kaže: “A samo se Allaha, među robovima Njegovim, boje učeni. Allah je, doista, silan i Onaj Koji oprašta grijeha.” (Fatir, 28)

Jezička definicija

Strah označava nemir i potresenost srca zbog očekivanja nečega neugodnog ili štetnog.

Šerijatskoterminološka definicija

Strah je osjećaj potpunog nemira i zabrinutosti u srcu, izazvan sviješću o prisustvu Allaha i mogućnosti Njegove kazne, ili strah od nečega što može biti štetno za čovjeka, prvenstveno na ahiretu.

STRAHOPOŠTOVANJE (*HAŠJE*)

Viši stepen straha. Ibn Usejmin, rahimehullah, kazao je: “Strahopoštovanje je strah koji je zasnovan na spoznaji veličine onoga koga se bojiš i apsolutnosti njegove vlasti.”



Obaveznost straha od Allaha

Strah od Allaha Uzvišenog jedna je od najvažnijih vjerskih obaveza zbog brojnih važnih učinaka koje donosi.

Strah od Uzvišenog Allaha, a ne od drugih, uvjet je vjerovanja. Allah Uzvišeni naređuje da se samo Njega bojimo i da Njega veličamo:

“To vas samo šejtan plaši pristalicama svojim, pa ih se ne bojte, nego se Mene bojte, ako ste vjernici!” (Alu Imran, 175)

“I samo od Mene strahujte!” (El-Bekara, 40)

“I spominji Gospodara svoga u sebi, ponizno i sa strahopoštovanjem.” (El-A‘raf, 205)

“A onom ko je od stajanja pred Gospodarom svojim strepio i dušu od prohtjeva uzdržao.” (En-Naziat, 40)

“A onome ko se bude bojao stajanja pred svojim Gospodarom pripast će dva perivoja.” (Er-Rahman, 46)

Strah od Allaha Uzvišenog temeljna je osnova vjere, bez koje vjerovanje nije ispravno. Strah je temelj pobožnosti i najvažniji faktor mudrosti. Sasvim suprotno od drugih religija, kao što je kršćanstvo, koje zagovara samo ljubav prema Bogu, bez prisustva straha i razmišljanja o posljedicama.

Hasan el-Basri, rahimehullah, rekao je: “Vjernik je onaj kod kojeg se nalazi dobročinstvo i strahopoštovanje, dok je munafik onaj kod kojeg se nalazi zlo i sigurnost (lažan osjećaj sigurnosti od Allahove kazne, op. rec.)!”

Ibn Kajjim, rahimehullah, rekao je: “Strah je jedna od najvažnijih stanica na putu vjernika, i najkorisnijih za njegovo srce. Obaveza je svakog pojedinca.”

Položaj straha

Strah je među najuzvišenijim stepenima, kako Allah Uzvišeni kaže: “A samo se Allaha, među robovima Njegovim, boje učeni. Allah je, doista, silan i Onaj Koji oprašta grijeh.” (Fatir, 28)

Poslanik, sallallahu alejhi ve sellem, postigao je taj stepen, te je rekao: “Zaista sam ja najbogobojazniji među vama i najviše se Allaha bojim.” (Buhari i Muslim)



Također, strah od Allaha u tajnosti jedan je od najviših stepena.

Allah Uzvišeni kaže:

“O vi koji vjerujete, Allah će vas dovoditi u iskušenje sa divljači koja će biti nadohvat ruku vaših i kopanja vaših – da bi Allah znao onoga koji Ga se boji kad ga niko ne vidi. A onoga ko i poslije toga nasilje učini, bolna patnja čeka.” (El-Maida, 94)

“Tvoje upozoravanje koristi samo onome koji Opomenu slijedi i Svemilosnog se boji, i kada ga niko ne vidi; njega obraduj oprostom i nagradom lijepom!” (Ja-sin, 11)

Kategorije ljudi shodno stepenu straha od Allaha

1. Bliski vjernici, koji prednjače u dobru, jesu oni koje je strah od Allaha potaknuo na brzo djelovanje i činjenje dobrih djela kako bi se približili Allahu kroz obavljanje propisanih obreda i nafila te suzdržavanje od harama i sumnjivih stvari. Allah Uzvišeni pohvaljuje ovu skupinu: “Oni koji iz bojazni prema Gospodaru svome strahuju, i oni koji u ajete i znakove Gospodara svoga vjeruju, i oni koji druge Gospodaru svome u obožavanju ne pridružuju, i oni koji od onoga što im je dato udjeljuju, a srca su im puna straha, zato što će se vratiti svome Gospodaru, oni hitaju da čine dobra djela, i u njima druge pretiču!” (El-Mu'minun, 57-61)
2. Umjereni su oni koje je strah od Allaha potaknuo na izbjegavanje harama i izvršavanje obaveza. Dakle, to su umjereni bogobojazni vjernici.
3. Grešnici su oni koji sami sebi nepravdu čine. To su vjernici kod kojih je osnova straha od Allaha prisutna, što ih sprečava od širka, činjenja djela koja izvede iz islama i nekih velikih grijeha. Ipak, zbog pomanjkanja straha od Allaha, oni čine neke velike grijehe i izostavljaju neke obavezne farzove. Oni su grešnici i zaslužuju kaznu shodno njihovim prijestupima, ali ostaju unutar okvira islama.
4. Ekstremni fanatici su oni koje je pretjeran strah doveo do očajanja i gubljenja nade u Allahovu milost. Oni su grešnici, ekstremisti. Vjernik ne smije očajavati u pogledu Allahove milosti niti gubiti nadu u Njegov oprost.

VRSTE STRAHA

1. Strah od Allahove srdžbe i gubitka Njegovog zadovoljstva. Ovo je strah koji posjeduju oni koji Allaha Uzvišenog vole. Allahova srdžba dolazi iz jednog uzroka – neposlušnosti prema Njemu. Ako rob ne bude neposlušan, neće biti kažnjen. Iz tog je razloga Alija b. Ebi Talib, radijallahu anhu, rekao: “Zapamtite pet stvari, čak i kada biste jahali deve, one bi se iscrpile prije negoli biste ih dokučili: neka Allahov rob ne strahuje ni od čega osim od svog grijeha, neka se ne nada ničemu ni od koga osim od svoga Gospodara...”

2. Strah od svjetovne i ahiretske kazne. To je strah koji uvijek prati srce vjernika. Opisujući osobine vjernika, Allah Uzvišeni kaže: “I oni koji od kazne Allahove strahuju, a od kazne Gospodara svoga niko nije siguran.” (El-Mearidž, 27-28)

Svaki grijeh na koji je Uzvišeni Allah upozorio prijeteći Svojim prokletstvom i srdžbom razlog je za veliki strah. Mnogi su ljudi godinama ostali u patnji zbog prokletstva koje su zaslužili činjenjem velikih grijeha. Oni su potcijenili svoje grijehe, zaboravili na njih i zanemarili ih, pa se nisu pokajali niti oslobodili svoje patnje.

3. Strah od gubitka nagrade. Vrijedan radnik nada se plodovima svog rada, ali se boji da bi njegovi naponi mogli biti uzaludni zbog nekog prijestupa koji bi mogao počinuti, što bi ga naposljetku koštalo velike nagrade koju priželjkuje.

Najveći strah kojeg se pobožni plaše jeste širk (mnogoboštvo), jer poništava sva djela i ne oprašta se, bez obzira na nivo znanja i pobožnosti. Uzvišeni Allah Svome Poslaniku, sallallahu alejhi ve sellem, kaže: “A tebi, i onima prije tebe, objavljeno je: ‘Ako budeš druge Allahu u obožavanju pridruživao, tvoja djela će sigurno propasti, a ti ćeš među gubitnicima biti.’” (Ez-Zumer, 65) Također, o Svojim poslanicima kaže: “A da su oni Allahu ikoga u obožavanju pridruživali, sigurno bi propalo ono što su radili.” (El-En‘am, 88)



Plodovi straha od Uzvišenog Allaha

1. Znanje i pronicljivost. Allah Uzvišeni kaže: “Zar je takav kao onaj koji u noćnim satima u molitvi vrijeme provodi, padajući licem na tlo i stojeći, strahujući od ahireta i nadajući se milosti Gospodara svoga? Reci: ‘Zar su isti oni koji znaju i oni koji ne znaju?! Samo se prisjećaju oni koji pameti imaju!’” (Ez-Zumer, 9)
2. Prednjačenje u činjenju dobra. Uzvišeni kaže: “Oni koji iz bojazni prema Gospodaru svome strahuju, i oni koji u ajete i znakove Gospodara svoga vjeruju, i oni koji druge Gospodaru svome u obožavanju ne pridružuju, i oni koji od onoga što im je dato udjeljuju, a srca su im puna straha, zato što će se vratiti svome Gospodaru – oni hitaju da čine dobra djela, i u njima druge pretiču.” (El-Mu’minun, 57-61)
3. Moć i prosperitet na Zemlji. Uzvišeni kaže: “Oni koji nisu vjerovali govorili su poslanicima svojim: ‘Ili ćete se u vjeru našu vratiti ili ćemo vas, doista, iz zemlje naše protjerati!’ A poslanicima je Gospodar njihov objavljivao: ‘Mi ćemo zulumčare sigurno uništiti. I poslije njih vas na Zemlji nastaniti. Bit će to za one koji će se polaganja računa preda Mnom bojati i koji će od prijetnje Moje strahovati.’” (Ibrahim, 13-14)
4. Sigurnost na Sudnjem danu. Od Ebu Hurejre, radijallahu anhu, prenosi se da je Allahov Poslanik, sallallahu alejhi ve sellem, prenio od svog Gospodara, Uzvišenog i Veličanstvenog, da je rekao: “Tako mi Moje veličine, neću spojiti Svome robu dva straha i dvije sigurnosti: ako Me se boji na ovom svijetu, garantujem mu sigurnost na Sudnjem danu, a ako je na ovom svijetu siguran od Mene, uplašit ću ga na Sudnjem danu.” (Ibn Hibban; vjerodostojan po ocjeni Albanija)
5. Spas od vatre. Od Ebu Hurejre, radijallahu anhu, prenosi se da je Allahov Poslanik, sallallahu alejhi ve sellem, rekao: “Neće ući u Vatru onaj ko je zaplakao iz strahopoštovanja prema Allahu Uzvišenom, sve dok se mlijeke ne vrati u vime.” (Tirmizi; vjerodostojan po ocjeni Albanija)
6. Allahovo zadovoljstvo. Allah Uzvišeni kaže: “Allah će biti njima zadovoljan, a i oni će biti Njime zadovoljni. To će biti za onoga koji se bude bojao Gospodara svoga.” (El-Bejjine, 8)



7. Uživanje u hladu Arša. U hadisu o sedmorici koje će Allah zakloniti u Svoju hladovinu, na dan kada neće biti druge hladovine osim Njegove, spominje se: "I čovjek kojeg je pozvala žena ugledna i lijepa, a on je rekao: 'Ja se bojim Allaha.'" (muttefekun alejhi)
8. Radost i uživanje u džennetu. Uzvišeni kaže: "A onome ko se bude bojaio stajanja pred svojim Gospodarom pripast će dva perivoja." (Er-Rahman, 46) Također je kazao: "Podižu se bokovi njihovi iz postelja i mole svoga Gospodara iz straha i želje, a dio onog što im Mi dajemo udjeljuju. I niko ne zna šta je za njih skriveno, a što će oči njihove obradovati, kao nagrada za ono što su činili." (Es-Sedžda, 16-17)

Uzroci koji pobuđuju strah od Allaha

1. Podsjećanje na Allahovu veličinu i uzvišenost. Allah Uzvišeni o Svojoj veličini kaže: "Oni nisu veličali Allaha onako kako Ga treba veličati; a čitava će Zemlja na Kijametskom danu u šaci Njegovoj biti, a nebesa će u desnici Njegovoj smotana ostati. Čist je On i Uzvišen iznad onih koje Njemu smatraju ravnim!" (Ez-Zumer, 67)

Od Ibn Omera, radijallahu anhu, prenosi se da je Poslanik, sallallahu alejhi ve sellem, jednom prilikom na minberu proučio ovaj ajet, pa rekao: "Gospodar veliča Sebe: 'Ja sam Silni, Ja sam Uzvišeni (Gordi), Ja sam Vladar, Ja sam Moćni, Ja sam Plemeniti.'" "Tada je minber zadrhtao pod Allahovim Poslanikom, sallallahu alejhi ve sellem, toliko da smo pomislili da će se srušiti." (Ahmed; vjerodostojan po ocjeni Arnauta)

2. Svijest o prizoru stajanja pred Allahom. To je stvarnost koja će se sigurno dogoditi. Ko se sjeti ovog prizora i boji ga se na ovom svijetu, povećat će se njegovo strahopoštovanje i bojazan prema Allahu. Uzvišeni kaže: "A onom ko je od stajanja pred Gospodarom svojim strepio i dušu od prohtjeva uzdržao, džennet će baš boravište biti." (En-Naziat, 40-41)
3. Slušanje Kur'ana, hadisa, savjeta i hutbi. Allah Uzvišeni kaže: "Allah objavljuje najljepši govor, Knjigu sličnu po smislu, čije se pouke ponavljaju. Od nje se koža ježi u onih koji se Gospodara svoga boje, a zatim, kad se spomene ime Allahovo, kože se njihove i srca njihova smiruju. To je Allahova Uputa kojom On upućuje koga hoće; a onoga kome Allah dâ da je u zabludi, niko ga na Pravi put uputiti neće." (Ez-Zumer, 23)



4. Dova. Jedna od dova koju je Allahov Poslanik, sallallahu alejhi ve sellem, učio bila je: "Allahu, podari nam toliko strahopoštovanja prema Tebi koliko će biti dovoljno da nas spriječi od grijeha prema Tebi." (Tirmizi; dobar po ocjeni Albanija) U drugoj dovi je molio: "Allahu moj, molim Te za strahopoštovanje prema Tebi, tajno i javno." (Nesai; vjerodostojan po ocjeni Albanija)
5. Često spominjanje Allaha. Nemar i nehaajnost čine srce tvrdim, a osoba koja je nemarna i stalno zaboravlja na Allaha, malo po malo, zatvara svoje srce toliko da ga kasnije ne pogađa ni opomena ni savjet. Allah Uzvišeni kaže: "I ne slušaj onoga čije smo srce da Nas spominje nehaajnim učinili, koji strast svoju slijedi i čiji su postupci propali." (El-Kehf, 28)
6. Udaljavanje od onog što daje osjećaj sigurnosti od Allahove kazne. Postoje prepreke koje ne dozvoljavaju da se u srcu čovjeka razvije istinski strah od Allaha, a to su grijesi, ljubav prema dunjaluku i njegovim ukrasima, loše društvo, nemar, nedostatak osjećajnosti, odugovlačenje s pokajanjem itd.

NADA (REDŽA)

Nada je vodič koji podstiče čovjeka na putu prema Allahu, čineći mu putovanje prijatnim i podstičući ga na ustrajnost. Bez nade, niko ne bi krenuo na put, jer strah sam po sebi ne pokreće čovjeka, on ga uznemirava, već ga pokreće ljubav, a vodi nada.

Jezička definicija

Nada je očekivanje ili želja da će se desiti nešto dobro i korisno. Suprotno od straha.

Šerijatskoterminološka definicija

Nada je veza s Allahom koja podstiče srce na očekivanje Njegove dobrote i zadovoljstva na ovom i onom svijetu. Allah Uzvišeni o Poslaniku, sallallahu alejhi ve sellem, i njegovim ashabima kaže: "Muhammed je Allahov poslanik, a njegovi su sljedbenici strogi prema nevjernicima, a samilosni među sobom; vidiš ih kako ruku i sedždu čine, želeći od Allaha obilje i zadovoljstvo..." (El-Feth, 29)

Suprotno od nade je očaj. Allah Uzvišeni kaže: "I ne gubite nadu u milost Allahovu; doista, nadu u Allahovu milost gube samo ljudi koji su nevjernici." (Jusuf, 87)

Onaj ko teži ka Allahu nalazi se između dva prizora:

1. Pogleda na sebe, svoje mane i nedostatke u djelima. To mu otvara vrata straha.
2. Pogleda na veličinu Allahove milosti i dobrote. To mu otvara vrata nade.

Razlika između nade i želje

1. Želja dolazi uz lijenost i ne podstiče na trud i rad.
2. Nada dolazi uz trud, zalaganje i oslanjanje na Allaha.



Čovjek koji radi po Allahovoj naredbi i nada se Njegovoj nagradi, ili se pokaje za grijeha i nada Njegovom oprost, jeste onaj koji se iskreno nada. Međutim, čovjek koji se nada milosti i oprost bez pokornosti i pokajanja – samo se vara i priželjkuje. Hasan el-Basri, rahimehullah, rekao je: “Neki su ljudi obmanuti nadom dok ne odu s ovog svijeta bez ijednog dobrog djela. Kažu: ‘Imam lijepo mišljenje o svom Gospodaru.’ Lažu. Da imaju lijepo mišljenje o svom Gospodaru, činili bi dobra djela.”

Plodovi nade

1. Nada vodi vjernika ka češćem spominjanju Uzvišenog Allaha, upućivanju dova i izražavanju potrebe za Njegovom velikom milošću i zadovoljstvom. Što je nada veća, to je postojanost u ibadetu i ustrajnost u njemu veća.
2. Povećava zadovoljstvo Allahovom odredbom, težeći ka Njegovoj milosti, oprost i prelaženju preko posrtaja.
3. Ustrajnost u pokornosti, bez obzira na okolnosti. Nada pomaže vjerniku da ustraje u činjenju dobrih djela.
4. Štiti od Allahove srdžbe. Onaj koji se nada često dovi i traži od Allaha Uzvišenog. Poslanik, sallallahu alejhi ve sellem, rekao je: “Ko god ne bude molio i tražio od Allaha, On će se razljutiti na njega.” (Tirmizi; vjerodostojan po ocjeni Albanija)

Uzroci ostvarenja nade

1. Sjećanje na Allahove blagodati
2. Sjećanje na Allahovu raniju dobrotu prema čovjeku
3. Sjećanje na Allahova obećanja o velikoj nagradi, Njegovoj darežljivosti i plemenitosti
4. Sjećanje na širinu Allahove milosti i spoznaju da je Njegova milost pretekla Njegovu srdžbu
5. Poznavanje Allahovih lijepih imena i uzvišenih svojstava koja se odnose na nadu



Vjernik je između straha i nade

El-Ajni kaže: “U ovome su dvije skupine zastranile: jedna je dala prednost nadi, a druga je dala prednost strahu. Međutim, stav ehli-sunneta i džemata jeste balans između ova dva stanja.”

Ibn Tejmijje, rahimehullah, rekao je: “Strah uvijek sadrži nadu, jer bez nade, strah bi se pretvorio u očaj. Isto tako, nada podrazumijeva strah, jer bez straha, pretvorila bi se u sigurnost (od Allahove kazne).”

Dobročinstvo u ibadetu postiže se kombinacijom straha i nade. Onaj ko to učini, Allahova milost mu je bliska.

Jedan od načina postizanja balansa između nade i straha jeste prisjećanje na nagradu i kaznu. Od Ebu Hurejre, radijallahu anhu, prenosi se da je Allahov Poslanik, sallallahu alejhi ve sellem, rekao: “Kada bi vjernik znao koje kazne kod Allaha postoje, niko ne bi očekivao džennet, a kada bi nevjernik znao koliko kod Allaha ima milosti, ne bi nikad izgubio nadu u džennet.” (Buhari i Muslim)

Ibn Mes‘ud, radijallahu anhu, prenosi da je Allahov Poslanik, sallallahu alejhi ve sellem, rekao: “Džennet je bliži svakom od vas nego remen njegove obuće, a i džehennem također.” (Buhari)

Ovo ukazuje na nužnost balansiranja između straha i nade, bez davanja prednosti jednom nad drugim.

Učenjaci su kazali: “Ko Allaha obožava samo iz ljubavi, on je zindik (otpadnik od vjere); ko Ga obožava samo iz straha, on je harurija (ekstremista)²; ko Ga obožava samo iz nade, on je murdžija (zapostavlja djela); a ko Ga obožava kombinacijom ljubavi, straha i nade, on je pravi vjernik.”

Dakle, srce pokreću tri emocije: ljubav, strah i nada. Ko voli Allaha, pokorava Mu se; ko Ga se boji, pokorava Mu se; i ko se nada Njegovoj nagradi, pokorava Mu se. Potpuno vjerovanje postiže se kada čovjek sastavi sve tri osobine: pokorava se Allahu iz ljubavi prema Njemu, iz straha od Njega i iz nade u Njegovu nagradu i milost.

Ipak, postoje situacije u kojima je primjereno dati prednost nadi i one u kojima je primjereno dati prednost strahu.

² Misli se na haridžije.



Neke od situacija u kojima vjernik daje prednost nadi nad strahom su:

1. Trenutak smrti

Džabira, radijallahu anhu, kaže: “Čuo sam Vjerovjesnika, sallallahu alejhi ve sellem, kako tri dana prije svoje smrti kaže: ‘Neka niko od vas ne umre a da o Allahu nema lijepo mišljenje.’” (Muslim)

Zbog toga su neki od čestitih prethodnika naređivali svojim sinovima da im pred smrt uče ajete o milosti kako bi njihova duša napustila ovaj svijet s lijepim mišljenjem o Allahu, nadajući se Njegovom oprost, milosti i primanju djela.

2. U slučajevima gubljenja nade u Allahovu milost zbog vlastitih grijeha

S druge strane, postoje situacije u kojima se prednost daje strahu nad nadom:

1. U vremenima velikog blagostanja

2. Prilikom činjenja grijeha

3. Kada se osjeti sigurnost od Allahove kazne i obmane

Strah, želja i nada su ibadeti koji približavaju Allahu, subhanahu ve te'ala. Strah od Allaha motivira vjernika da se kloni grijeha i zabrana, dok želja i nada za džennetom podstiču na činjenje dobrih djela i svega što donosi Allahovo zadovoljstvo. Stoga je Uzvišeni Allah naredio ove ibadete kazavši: “A Njemu se molite sa strahom i nadom; milost je Allahova, doista, blizu onih koji dobra djela čine.” (El-A'raf, 56)

Isto tako, Uzvišeni Allah pohvalio je Svoje poslanike riječima: “Oni su se trudili da što više dobra učine i molili su Nam se u nadi i strahu, i bili su prema Nama ponizni” (El-Enbija, 90), što znači da su žudjeli za Njegovim džennetom, a bojali se i strahovali od Njegove kazne.

Uzvišeni Allah istovremeno upozorava i donosi radosne vijesti te potiče na strah i nadu: “Kaži robovima Mojim da sam Ja, zaista, Oprostitelj grijeha, Milostivi, ali da je i kazna Moja, doista, bolna kazna!” (El-Hidžr, 49-50)

Također, Uzvišeni je opisao stanje Svoga plemenitog Poslanika, sallallahu alejhi ve sellem: “Reci: ‘Ako budem neposlušan svome Gospodaru, ja se plašim patnje na Velikom danu.’” (El-En'am, 15)

Poslanik, sallallahu alejhi ve sellem, neprestano je tražio utočište kod Allaha od Vatre i naređivao to svakom muslimanu pri obavljanju svakog namaza.



Prenosi se od Ebu Hurejre, radijallahu anhu, da je Poslanik, sallallahu alejhi ve sellem, rekao: “Kada neko od vas završi sa zadnjim tešehhudom (učenjem na sjedenju u namazu), neka od Allaha Uzvišenog traži utočište od četvero: od džehennemske kazne, od kaburske kazne, od iskušenja života i smrti i od zla Dedžala.” (Muslim)

Poslanik, sallallahu alejhi ve sellem, preporučio je svakom muslimanu da od Allaha, nakon svakog ezana, traži za njega *vesile*, tj. posebno mjesto u džennetu. Prenosi se od Abdullaha b. Amra b. Asa, radijallahu anhuma, da je čuo Poslanika, sallallahu alejhi ve sellem, kako kaže: “Kada čujete mujezina, ponavljajte za njim ono što on govori, zatim donosite salavat na mene, jer ko donese jedan salavat na mene, Allah će na njega donijeti deset. Zatim tražite za mene vesile, jer to je posebno mjesto u džennetu, koje će pripasti samo jednom od Allahovih robova, a ja se nadam da ću to biti ja. Ko za mene zatraži vesile, bit će mu dozvoljeno moje zauzimanje.” (Muslim)

Poslanik, sallallahu alejhi ve sellem, stalno je u dovama tražio i molio Allaha za džennet i sve što njemu približava, bilo riječju ili djelom, te se utjecao Allahu od Vatre i svega što njoj približava, bilo riječju ili djelom. Kur’anski tekstovi obiluju poticajima na zasluživanje dženneta i upozorenjima na Vatru.

LJUBAV (*MEHABBET*)

Radost oka i užitak duše zaljubljenika nalaze se u pokornosti voljenom, za razliku od onoga ko se pokorava nevoljko, podnoseći obaveze s mukom, smatrajući da nikada ne bi poslušao da nije prisile i kazne gospodara. Takav se pokorava poput prisiljenog čovjeka koji je potčinjen svom tlačitelju. S druge strane, zaljubljenik koji pokornost voljenom doživljava kao hranu, blagodat, užitak i radost – radi bez oklijevanja i umora i sretan je na ovom i na budućem svijetu.

Jezička definicija

Ljubav je prijateljski osjećaj privrženosti, naklonosti i simpatije prema nekoj osobi, biću ili stvari.

Šerijatskoterminološka definicija

Ljubav je osjećaj naklonosti i privrženosti srca Allahu, Njegovom Poslaniku, sallallahu alejhi ve sellem, vjeri islamu i dobrim djelima, nadilazeći svjetovne i prolazne privrženosti.

Pravni status ljubavi prema Allahu Uzvišenom

Ljubav prema Allahu vjerska je obaveza svakog čovjeka i niko je ne smije zanemariti osim onoga ko je nepravedan prema samom sebi, neznalica kojem je to uskraćeno.

Allah Uzvišeni kaže: “Reci: ‘Ako su vam očevi vaši, i sinovi vaši, i braća vaša, i žene vaše, i rod vaš, i imanja vaša koja ste stekli, i trgovačka roba za koju strahujete da neće prođe imati, i kuće vaše u kojima se prijatno osjećate – miliji od Allaha i Poslanika, i od borbe na Njegovom putu, onda pričekajte dok Allah Svoju odluku ne donese. A Allah neće uputiti ljude buntovnike.” (Et-Tevba, 24)



Allah Uzvišeni zaprijetio je onima koji prednost daju ljubavi prema nečemu drugom nad ljubavi prema Njemu i Njegovom Poslaniku, sallallahu alejhi ve sellem, a prijetnja se odnosi samo na ono što je zabranjeno, što znači da je davanje prednosti ljubavi prema Allahu obavezno.

Prenosi Enes b. Malik, radijallahu anhu, da je Poslanik, sallallahu alejhi ve sellem, rekao: “Tako mi Onoga u Čijoj ruci je moja duša, niko od vas neće biti istinski vjernik dok mu ja ne budem draži od njegovog oca, djeteta i svih ljudi.” (muttefekun alejhi)

Ibn Redžeb kaže: “Činjenica je da je ljubav prema Poslaniku, sallallahu alejhi ve sellem, slijed ljubavi prema Uzvišenom, jer se Poslanik, sallallahu alejhi ve sellem, voli iz ljubavi prema Allahu i zbog Allahove naredbe da se on voli, slijedi i da mu se poslušnost iskazuje. Ako se iman postiže jedino stavljanjem ljubavi prema Poslaniku, sallallahu alejhi ve sellem, ispred ljubavi prema samome sebi, djeci, roditeljima i svim ljudima, kako je tek s ljubavi prema Allahu?”

Razlozi Allahove ljubavi prema robu i ljubavi roba prema Allahu Uzvišenom

Ibn Kajjim, rahimehullah, naveo je deset razloga koji privlače Allahovu ljubav prema Njegovom robu i ljubav roba prema Allahu:

1. Čitanje i učenje Kur’ana uz duboko razmišljanje o njegovim značenjima i onome što se njime želi.
2. Približavanje Allahu dobrovoljnim djelima nakon obaveznih, kao što je spomenuto u kudsî-hadis: “Moj će Mi se rob ustrajno približavati nafilama, pa ću ga zavoljeti.” (Buhari)
3. Neprekidno spominjanje Allaha u svim stanjima: jezikom, srcem i djelima, jer to je mjerilo ljubavi prema Njemu.
4. Stavljanje Allahovih želja ispred svojih, posebno kada čovjekom ovlada strast.
5. Istinska spoznaja Allahovih imena i svojstava te razmišljanje o sveobuhvatnosti te spoznaje.
6. Promišljanje o Njegovoj dobroti, blagodati, vidljivim i skrivenim darovima.
7. Skrušenost srca pred Njim.



8. Povlačenje u osamu s Allahom u vrijeme Njegovog silaska, u posljednjoj trećini noći, učenje Njegove Knjige te završavanje s istigfarom i tevbom (traženjem oprosta i pokajanjem).
9. Druženje s vjernicima koji iskreno vole Uzvišenog Allaha, usvajanje onoga najljepšeg iz njihova govora te govorenje samo kada je to od koristi svima.
10. Udaljavanje od svega što odvaja srce od Allaha Uzvišenog.

Ibn Kajjim kaže: "Putem ovih deset razloga zaljubljenici su postigli stepene ljubavi i došli do Voljenog."

Znaci ljubavi prema Allahu Uzvišenom

Jedan od znakova ljubavi roba prema Allahu jeste i ljubav prema Allahovoj Riječi. Abdullah b. Mesud, radijallahu anhu, rekao je: "Ko želi znati voli li Allaha Uzvišenog, neka ispita svoj odnos prema Kur'anu. Ako voli Kur'an, voli i Allaha Uzvišenog, jer Kur'an je Allahov govor."

Sufjan b. Uejne, rahimehullah, kaže: "Tako mi Allaha, nećete doći vrhunac ove ljubavi sve dok vam ništa ne bude draže od Allaha Uzvišenog. Ako voli Kur'an, voli i Allaha Uzvišenog."

Plodovi ljubavi prema Allahu Uzvišenom

1. Allahova ljubav prema Svom robu

Aiša, radijallahu anha, prenosi da je Allahov Poslanik, sallallahu alejhi ve sellem, poslao jednog čovjeka kao vođu ekspedicije. Taj čovjek uvijek je svoj namaz završavao surom Ihlas: "Reci: On je Allah – Jedan!" Kada su se vratili, ashabi su spomenuli to Poslaniku, sallallahu alejhi ve sellem, koji im je rekao: "Pitajte ga zašto to radi?" Oni su ga pitali, a on je odgovorio: "Zato što sadrži opis Milostivog, pa volim da je učim." Poslanik, sallallahu alejhi ve sellem, rekao je: "Obavijestite ga da ga Allah voli." (muttefekun alejhi)

2. Ljubav meleka i stanovnika nebesa i Zemlje

Ebu Hurejre, radijallahu anhu, prenosi da je Allahov Poslanik, sallallahu alejhi ve sellem, rekao: "Kada Allah zavoli nekog čovjeka, pozove Džibrila: 'Allah voli toga, pa ga i ti voli!' Onda ga i Džibril zavoli, te Džibril razglasi među stanovnicima nebesa: 'Allah voli toga i toga, pa ga i vi volite!' Potom



ga zavole i stanovnici nebesa, a zatim mu se da prijem na Zemlji (tj. ostaje u lijepoj uspomeni).” (muttefekun alejhi)

3. Osjećaj slasti imana

Poslanik, sallallahu alejhi ve sellem, rekao je: “Kod koga se nađu tri (svojstva), osjetit će slast vjerovanja: da mu Allah i Njegov Poslanik budu draži od svega ostalog, da voli svakog čovjeka samo u ime Allaha i da mrzi povratak u nevjerstvo kao što mrzi da bude bačen u Vatru.” (Buhari i Muslim)

4. Spasenje od Vatre

Kao što Allah Uzvišeni kaže: “Ali, oni koji vjeruju, još više Allaha vole! A da znaju oni koji su zulum činili – kada kaznu dožive, da će vidjeti da moć sva Allahu pripada i da Allah strahovito kažnjava.” (El-Bekara, 165)

Kazna je određena za one koji ne vole Allaha Uzvišenog, dok su vjernici izabrali ljubav prema Allahu iznad ljubavi prema bilo čemu drugom, pa su tako zaslužili spas od patnje.

STRPLJENJE (*SABR*)

Vjernik se nalazi između strpljenja u izvršavanju obaveza koje mora ispuniti, strpljenja u izbjegavanju zabrana kojih se mora kloniti i strpljenja na sudbini koja ga zadesi.

Budući da su ovakva stanja neizbježna, strpljenje je nužno do smrti i spada u ključne osobine. Stoga, život ne može proći bez strpljenja, koje je univerzalni lijek za svaku bolest.

Jezička definicija

Strpljenje znači suzdržavanje, kontrolu i izdržljivost pred neugodnostima, poteškoćama ili iskušenjima.

Šerijatskoterminološka definicija

U šerijatskoj terminologiji, strpljenje podrazumijeva zadržavanje duše od njenih prohtjeva i strasti radi Allaha Uzvišenog, bez žaljenja i očajavanja u trenucima iskušenja, uz ustrajnost u činjenju dobrih djela i odustajanju od grijeha. Allah Uzvišeni kaže: “Budi strpljiv uz one koji se Gospodaru svome mole ujutro i navečer u želji za Licem Njegovim” (El-Kehf, 28), što znači: zadrži se s njima.

Šerijatskopравни status strpljenja

Strpljenje je obaveza prema jednoglasnom stavu ummeta. Allah Uzvišeni je na više mjesta u Svojoj Knjizi naredio strpljenje:

“Tražite sebi pomoć u strpljenju i namazu. To je doista teško, osim poniznima.” (El-Bekara, 45)

“O vi koji vjerujete, budite strpljivi i izdržljivi.” (Alu Imran, 200)

“Strpljiv budi! Ali, strpljiv ćeš biti samo uz Allahovu pomoć.” (En-Nahl, 127)

Strpljenje se u Kur'anu spominje mnogo puta i u različitim formama i kontekstima, od kojih su:



1. Pohvala strpljivih: "I oni koji su strpljivi u neimaštini i u bolesti, i za vrijeme borbe. To su oni koji su iskreni i oni su pravi bogobojažnici." (El-Bekara, 177)
2. Allahova ljubav prema strpljivima: "A Allah voli strpljive." (Alu Imran, 146)
3. Stjecanje Allahove blizine, koja je posebna i uključuje Njegovu zaštitu, pomoć i podršku: "A Allah je, zaista, uz strpljive" (El-Enfal, 46); "A Allah je sa strpljivima." (El-Bekara, 249)
4. Obećanje nagrade za njihova najbolja djela: "Mi ćemo, sigurno, one koji su strpljivi bili prema onom boljem što su činili nagraditi." (En-Nahl, 96)
5. Garancija pobjede i pomoći strpljivima: "Dakako! Ako strpljivi i bogobojažni budete; i ako vas oni napadnu naglo, Gospodar vaš će vam poslati pomoć od pet hiljada meleka obilježenih." (Alu Imran, 125) A Poslanik je, sallallahu alejhi ve sellem, rekao: "Znaj da pobjeda dolazi sa strpljivošću." (Ahmed; vjerodostojan po ocjeni Albanija)
6. Obavijest da se željena pobjeda i spas od nevolja te ulazak u džennet postiže strpljenjem: "Meleci će im ulaziti na vrata svaka. Selam neka je vama, zato što ste trpjeli, a divan li je ishod nakon dunjaluka!" (Er-Ra'd, 23-24)
7. Obavijest da samo strpljivi imaju koristi od znakova i pouka. Kao što je Uzvišeni rekao Musau, alejhi selam: "I Musaa smo poslali s dokazima Našim: 'Izvedi narod svoj iz tmina na svjetlo i podsjeti ga na Allahove blagodati.' To su, uistinu, znakovi za svakog ko je strpljiv i zahvalan." (Ibrahim, 5)
8. Strpljenje dovodi čovjeka do stepena vodstva. Šejhul-islam Ibn Tejmijje, rahimehullah, kaže: "Strpljenjem i uvjerenjem postiže se vodstvo u vjeri." Potom je proučio ajet: "Između njih Mi smo vođe određivali i oni su, odazivajući se zapovijedi Našoj, na Pravi put upućivali, jer su strpljivi bili i u ajetu i znakove Naše čvrsto vjerovali." (Es-Sedžda, 24)

Položaj strpljenja

Strpljenje ima značaj u vjeri kao što glava ima za tijelo. Nema vjere onaj ko nema strpljenja, kao što nema tijela onaj ko nema glave.

U Muslimovoj zbirci hadisa prenosi se da je Poslanik, sallallahu alejhi ve sellem, rekao: "Čudan li je primjer vjernika! Svako stanje u kojem se nađe je



dobro za njega, a to nije slučaj ni sa kim drugim osim sa vjernikom. Ako ga zadesi kakva radost, on se na njoj zahvali, pa mu bude dobro, a ako ga zadesi kakva nedaća, on se strpi, pa mu opet bude dobro. To ima samo vjernik i niko drugi.”

Također, Poslanik, sallallahu alejhi ve sellem, rekao je crnkinji, koja je imala epileptične napade i koja ga je zamolila da dovi za nju: “Ako hoćeš, strpi se i uči ćeš u džennet, a ako hoćeš, ja ću uputiti dovu Allahu da ozdraviš.” “Strpit ću se, ali moli Allaha da se ne otkrivam prilikom napada”, reče žena. Poslanik je, sallallahu alejhi ve sellem, za to uputio dovu. (Buhari i Muslim)

Omer b. Hattab, radijallahu anhu, rekao je: “Najbolji život postigli smo zahvaljujući strpljenju.”

VRSTE STRPLJENJA

1. Strpljenje u spominjanju Allaha, pokornosti i pozivanju Njemu, ustrajnosti u vjeri, borbi na Njegovom putu te traženju upute i znanja.

Uzvišeni Allah kaže: “O vi koji vjerujete, neka vas imanja vaša i djeca vaša ne zabave od spominjanja Allaha. A oni koji to učine, pravi su gubitnici.” (El-Munafikun, 9) I kaže: “Zato samo Njemu ibadet čini i u tome budi ustrajan!” (Merjem, 65) te: “Naredi porodici svojoj da obavlja namaz i ustraj u tome!” (Ta-ha, 132)

2. Strpljenje u suzdržavanju od grijeha, što znači da se osoba suzdrži od činjénja zabranjenog čak i kada postoje povodi za to. Primjer toga je slučaj Jusufa, alejhi selam, sa ženom Azizovom. Azizova žena ga je pozvala sebi u trenutku kada su svi uvjeti bili ispunjeni da odgovori na njen poziv, zatvorila je vrata i rekla: “Hodi!”, pozivajući ga sebi. Jusuf je odgovorio: “Gospodar (tj. gospodar dvora) me moj lijepo pazi, a zulumčari neće nikad uspjeti.” Time je aludirao na činjenicu da bi bilo nepravedno ako bi izdao povjerenje svog gospodara. Uzvišeni Allah dalje kaže: “I ona je bila poželjela njega, a i on bi nju bio poželio da od Gospodara svoga nije jasan znak ugledao.” (Jusuf, 24) Jusuf, alejhi selam, nije se prepustio grijehu iako su postojali jaki motivi za to, a prepreke bile uklonjene, što je jasan primjer strpljenja u suzdržavanju od grijeha.

U Buharijevom i Muslimovom *Sahihu* prenosi se hadis o sedam kategorija ljudi koje će Allah zaštititi Svojim hladom na Dan kada drugog hlada neće biti. U hadisu se spominje: “Čovjek koga pozove ugledna i lijepa žena (na blud), a on rekne: ‘Ja se bojim Svevišnjeg Allaha!’”

3. Strpljenje na nevoljama i sudbini. Allah, džellešānuhu, nagrađuje za to boljom nadoknadom, pohvalom, milošću i uputom. Uzvišeni Allah kaže: “A ti obraduj strpljive, one koji, kada ih kakva nevolja zadesi, samo kažu: “Mi smo, doista, Allahovi i Njemu ćemo se, sigurno, vratiti.” (El-Bekara, 155-156)



Lukman je savjetovao svoga sina kazavši mu: “O sinko moj, obavljaj namaz i traži da se čine dobra djela, a odvrćaj od hrđavih i strpljivo podnosi ono što te zadesi – to, doista, u istinske postupke spada.” (Lukman, 17)

Prenosi se od Ummu Seleme, radijallahu anha, da je rekla: “Čula sam Allahovog Poslanika, sallallahu alejhi ve sellem, kako kaže: ‘Nijedan musliman koga zadesi nesreća pa kaže ono što je Allah naredio: “Mi smo Allahovi i Njemu se vraćamo. Allahu, od Tebe očekujem nagradu za moju nesreću, pa me nagradi za nju i zamijeni ovu nedaću onim što je bolje!” a da mu Allah to neće nadoknaditi boljim od toga.’ Rekla je: “Kad je umro Ebu Seleme, rekla sam: ‘Koji musliman može biti bolji od Ebu Seleme?’ Pa sam ipak izgovorila ove riječi, i Allah mi je nadomjestio boljim – Allahovim Poslanikom, sallallahu alejhi ve sellem.” (Muslim)

Poslanik, sallallahu alejhi ve sellem, rekao je: “Istinsko strpljenje je ono pri prvom udarcu.” (muttefekun alejhi)

Plodovi strpljenja

1. Strpljenje donosi najveću i najbolju nagradu. Poslanik, sallallahu alejhi ve sellem, rekao je: “Niko neće dobiti bolji i veći dar od strpljenja.” (muttefekun alejhi)
2. Strpljenje je svjetlost. Prenosi Ebu Malik el-Eš'ari, radijallahu anhu, da je Poslanik, sallallahu alejhi ve sellem, rekao: “Namaz je svjetlo, sadaka je dokaz, strpljenje svjetlost, a Kur'an dokaz za ili protiv tebe.” (Muslim)

Iz tog razloga, kada je Uzvišeni Allah govorio o najvažnijim svjetovnim znamenjima u surama Ibrahim, Lukman, Sebe' i Šura, zaključio je govor riječima: “To su, uistinu, znakovi za svakog ko je strpljiv i zahvalan” (Ibrahim, 5), što znači da ove znakove i opomene vide i koriste se njihovim svjetlom samo strpljivi i zahvalni.

3. Uspjeh, pobjeda i postizanje ciljeva. Uzvišeni Allah kaže: “O vi koji vjerujete, budite strpljivi i izdržljivi, postojano bdijte i Allaha se bojte, da biste uspjeli!” (Alu Imran, 200) Također kaže: “Tražite sebi pomoć u strpljenju i namazu. To je doista teško, osim poniznima.” (El-Bekara, 45)

Ibn Abbas, radijallahu anhu, prenosi da je Poslanik, sallallahu alejhi ve sellem, rekao: “Znaj da pobjeda dolazi sa strpljivošću.”



4. Postizanje Allahove ljubavi. Allah, džellešānuhu, Svoju je ljubav uvjetovao strpljenjem i učinio je dostupnom onima koji su strpljivi. Rekao je: “A koliko je bilo vjerovjesnika uz koje su se brojni pobožni ljudi borili, pa nisu klonuli zbog onoga što bi ih zadesilo na putu Allahovom, niti su posustajali, niti se predavali?! A Allah voli strpljive.” (Alu Imran, 146)
5. Oprost i udvostručenje nagrade. Uzvišeni Allah kaže: “Osim onih koji su se strpili i dobra djela činili – njima pripada oprost i nagrada velika.” (Hud, 11) Također kaže: “Samo će onima koji budu strpljivi nagrada njihova biti isplaćena bez obračuna.” (Ez-Zumer, 10)
6. Džennet i Kuća hvale. Allah, džellešānuhu, nagrađuje vjernike džennetom za njihovo strpljenje. Kazao je: “Selam neka je vama, zato što ste trpjeli, a divan li je ishod nakon dunjaluka!” (Er-Ra’d, 24)

Poslanik, sallallahu alejhi ve sellem, prolazio je pored Jasira i Sumejje, radijallahu anhumā, dok su ih Kurejšije mučile i govorio im: “Strpite se, porodico Jasirova, vaša nagrada je džennet.” (Hakim; vjerodostojan po ocjeni Albanija)

U vezi sa strpljenjem na iskušenjima, Poslanik je, sallallahu alejhi ve sellem, kazao: “Uzvišeni Allah kaže: ‘Mome robu vjerniku nema kod Mene druge nagrade osim dženneta (onda) kada na dunjaluku uzmem dušu njegovoj voljenoj osobi, a on se strpi nadajući se Allahovoj nagradi.’” (Buhari)

U hadisu koji prenosi Ebu Musa el-Eš‘ari, radijallahu anhu, o osobi koja izgubi dijete i strpljivo podnese to iskušenje, Allah kaže: “Izgradite mu kuću u džennetu i nazovite je Kuća hvale.” (Tirmizi)

ZAHVALNOST (ŠUKR)

Budući da iman čine dvije polovine – polovina zahvalnosti i polovina strpljenja – obaveza je onome ko želi dobro za sebe i ko teži ka spasenju svoje duše da ne zapostavi ova dva velika temelja niti da odstupa od ova dva ispravna puta. Neka njegovo putovanje prema Allahu bude između ova dva pravca kako bi Allah učinio da bude među najboljim ljudima na Sudnjem danu.

Jezička definicija

Zahvalnost je otkrivanje, pokazivanje blagodati uz priznavanje i uvažavanje njenog izvora.

Šerijatskoterminološka definicija

U terminološkom smislu, zahvalnost je prepoznavanje dobrote i govor o njoj.

Zahvala se očituje kroz srce koje se ispunjava ljubavlju prema Dobročinitelju, udove koji su Mu pokorni i jezik koji Ga spominje i hvali.

Ibn Kajjim, rahimehullah, rekao je: “Ko prepozna blagodat, prepozna Darovatelja, prizna blagodat i pokori se Darovatelju, zavoli Ga i zadovoljan je Njime i onim što On daje, te koristi blagodat u pokornosti Njemu i onome što On voli. To je istinski zahvalan čovjek.”

Imam Gazali, rahimehullah, gotovo identično je definisao zahvalnost.

Primjer toga jeste namaz, koji objedinjuje sve tri vrste zahvalnosti:

1. Zahvalnost srcem, jer uključuje iskrenost i skrušenost
2. Zahvalnost jezikom, jer uključuje učenje Kur’ana i spominjanje Milostivog
3. Zahvalnost udovima, jer uključuje sedždu, ruku‘ i predaju selama



Razlika između hvale (*hamda*) i zahvalnosti (*šukra*)

Hvala je ograničena na jezik, za razliku od zahvalnosti, koja uključuje jezik, srce i udove. Kao što Allah kaže: “Radite i budite zahvalni (*šukra*), porodico Davudova! A malo je zahvalnih (*šukur*) među robovima Mojim.” (Sebe, 13)

Hvala može biti izražena za određenu blagodat, ali i bez nje, dok je zahvalnost uvijek odgovor na neku blagodat.

Šerijatskopравни status zahvalnosti

Ibn Kajjim, rahimehullah, rekao je: “Da je dužnost biti zahvalan Allahu, ukazuje nam razum, vjera i prirodni instinkt. Obligatnost zahvalnosti Allahu očiglednija je od svih drugih obaveza. Kako ne bismo bili dužni zahvaljivati, hvaliti, voljeti, veličati, priznavati Njegove blagodati i o njima kazivati kada je zahvalnost najdraža stvar Allahu i donosi najveću nagradu? Zbog zahvalnosti stvorio je sva stvorenja, objavio knjige i propisao vjerovjere, a to podrazumijeva i stvaranje uzroka pomoću kojih se zahvalnost upotpunjuje.”

Prema tome, zahvalnost je među najvažnijim obavezama muslimana. Musliman je mora spoznati, razmisliti o njoj i primijeniti njeno značenje u svom životu. Uzvišeni Allah kaže: “Pa, sjećajte se vi Mene, i Ja ću se vas sjećati! I zahvaljujte Mi, a nemojte Mi nezahvalni biti!” (El-Bekare, 152)

Također, Allah Uzvišeni je o zahvalnosti Njemu i roditeljima rekao: “Budi zahvalan Meni i roditeljima svojim, kod Mene je krajnje odredište.” (Lukman, 14)

Uzvišeni Allah o zahvalnosti na blagodatima kaže: “Da oni jedu plodove njihove – a nisu to ruke njihove privrijedile – pa zašto neće da budu zahvalni?!” (Ja-sin, 35)

Uzvišeni Allah o zahvalnosti na uputi kaže: “‘O Musa’, reče On, ‘Ja sam tebe, doista, nad drugima poslanicama Svojim i govorom Svojim odabranim učinio. Ono što ti dajem uzmi i zahvalan budi!’” (El-A‘raf, 144)

Allah je, također, objasnio da je ibadet povezan sa zahvalnošću. Onaj ko je zahvalan, istinski obožava Allaha, dok onaj ko nije zahvalan, nije istinski obožavalac. Uzvišeni kaže: “O vi koji vjerujete, jedite dobra kojim smo vas opskrbili i Allahu zahvaljujte, ako, doista, samo Njemu ibadet činite.” (El-Bekare, 172)



Šerijatski propis nezahvalnosti na Allahovim blagodatima

Uzvišeni Allah osuđuje nezahvalnost na Njegovim blagodatima i objašnjava da je to uzrok Njegove kazne. Osuđujući one koji su nezahvalni u vremenu iskušenja, Allah kaže: “Ako čovjeku damo da osjeti milost Našu, pa mu je poslije uskratimo, tada on, zaista, pravi očajnik i nezahvalnik postaje.” (Hud, 9)

Allah osuđuje i osobinu *kenūd*, a to je poricatelj, koji broji nevolje, a zaboravlja blagodati. Uzvišeni kaže: “Čovjek je, zaista, prema Gospodaru svome poricatelj veliki.” (El-Adijat, 6)

Isto tako, Poslanik, sallallahu alejhi ve sellem, osudio je žene koje su nezahvalne svojim muževima navodeći da su one stanovnice Vatre. Rekao je: “Predočen mi je džehennem i vidio sam da su u njemu najbrojnije žene. One su nezahvalne.” “Da li one nijeću Allaha?” upitano je. “One nijeću”, rekao je on, “dobročinstvo (svoga) supruga. Nezahvalne su na dobročinstvu. Kada bi kojoj od njih cijelog života činio dobročinstvo, pa kasnije kod tebe vidi nešto sitno (što joj se ne sviđa), rekla bi: ‘Nisam od tebe nikad vidjela nekog dobra.’” (Buhari i Muslim)

Šerijatski propis zahvalnosti ljudima

Naša islamska i šerijatska pravila nalažu zahvalnost ljudima za njihovo dobročinstvo i ljubaznost prema njima. Roditelji su od onih kojima je najpreče izraziti zahvalnost. Uzvišeni Allah kaže: “Budi zahvalan Meni i roditeljima svojim.” (Lukman, 14)

Poslanik, sallallahu alejhi ve sellem, naredio je da se zahvaljujemo svakome ko nam učini dobro. U hadisu koji prenosi Džabir, radijallahu anhu, Poslanik, sallallahu alejhi ve sellem, kaže: “Kome bude dat kakav poklon, ako ima imetka, neka uzvрати na njega, a ako nema, neka ga pohvali riječima. Onaj ko to učini – zahvalan je, a ko to prikrije – nezahvalan je.” (Ebu Davud; dobar po ocjeni Albanija)

Zahvalnost Allahu povezana je sa zahvalnošću ljudima. Ebu Hurejre, radijallahu anhu, prenosi da je Poslanik, sallallahu alejhi ve sellem, rekao: “Nije zahvalan Allahu onaj koji nije zahvalan ljudima.” (Ebu Davud; vjerodostojan po ocjeni Albanija)



Dakle, hadis govori o tome da će onaj ko je po prirodi nezahvalan i poriče dobročinstvo ljudi biti sklon nezahvalnosti i prema Stvoritelju ljudi.

Prakse koje potiču zahvalnost

1. Podsjećanje na Allahove blagodati. Ševkani kaže: “Podsjećanje na blagodati podstiče zahvalnost.” Uzvišeni Allah kaže: “Ako vi budete brojili Allahove blagodati, nećete ih nabrojati.” (En-Nahl, 18) I kazao je: “Svaka blagodat koju uživate od Allaha je.” (En-Nahl, 53)

Gazali kaže: “Ko ne vjeruje da je nagrada za nevolju veća od same nevolje – ne može se očekivati od njega da će biti zahvalan na toj nevolji.”

2. Skretanje pažnje na one koji su u težem položaju od tebe. Uzvišeni Allah kaže: “On čini da jedni druge na Zemlji smjenjujete i On vas po položajima jedne iznad drugih uzdiže, da bi vas iskušao u onome što vam daje.” (El-En‘am, 165)

Ebu Hurejre, radijallahu anhu, prenosi da je Poslanik, sallallahu alejhi ve sellem, rekao: “Gledajte u one ispod vas, a nemojte gledati u one iznad vas, to vam je bolje da ne biste potcjenjivali Allahove blagodati.” (Muslim)

3. Svijest o odgovornosti za dobijene blagodati. Uzvišeni Allah kaže: “Zatim ćete Dan taj o blagodatima biti pitani sigurno!” (Et-Tekasur, 8)

Neki su ljudi pogrešno razumjeli ovo pitanje, pa su sebi zabranili uživanje u blagodatima kako ne bi za njih bili pitani na Sudnjem danu. Međutim, Allah, subhanehu ve te‘ala, dozvolio nam je da uživamo u Njegovim blagodatima, ali i naredio da Mu na njima budemo zahvalni. Uzvišeni Allah kaže: “O vi koji vjerujete, jedite dobra kojim smo vas opskrbili i Allahu zahvaljujte, ako, doista, samo Njemu ibadet činite.” (El-Bekara, 172)

4. Svijest o tome da Allah voli zahvalne. Katade kaže: “Vaš Gospodar je Onaj Koji daruje blagodati i voli zahvalnost.”

5. Dova Allahu Uzvišenom da nam pomogne u zahvalnosti. Poslanik, sallallahu alejhi ve sellem, naredio je Muazu b. Džebel, radijallahu anhu, da nakon svakog namaza kaže: “Allahu, podupri me u sjećanju na Tebe, zahvalnosti Tebi i u pravom robovanju Tebi!” (Ebu Davud; vjerodostojan po ocjeni Albanija)



Plodovi zahvalnosti

1. Allahovo zadovoljstvo. Prenosi Enes b. Malik, radijallahu anhu, da je Poslanik, sallallahu alejhi ve sellem, rekao: "Allah je zadovoljan robom koji Mu zahvali kad pojede zalogaj i popije gutljaj." (Muslim)
2. Spas od Allahove kazne. Allah je u Svojoj Knjizi jasno kazao da neće kažnjavati ljude koji Mu budu zahvalni i u Njega vjerovali. Uzvišeni Allah kaže: "Zašto bi vas Allah kažnjavao ako budete zahvaljivali i vjerovali!? Allah je Zahvalni i Onaj Koji sve zna." (En-Nisa, 147)
3. Trajnost i povećanje blagodati. Uzvišeni Allah kaže: "I kad je Gospodar vaš objavio: 'Ako budete zahvalni, Ja ću vam sigurno još više dati; budete li nezahvalni, žestoka će, doista, biti kazna Moja.'" (Ibrahim, 7) Stoga, blagodati se zahvalnošću intenziviraju i od nestanka čuvaju.

Omer b. Abdulaziz, rahimehullah, rekao je: "Vežite Allahove blagodati zahvalnošću Allahu."

Zbog toga su neki učenjaci nazivali zahvalnost "okovom za blagodati".

Strpljenje i zahvalnost

U komentaru ajeta: "Čovjeka smo stvorili da je u naporu" (El-Beled, 4) Hasan el-Basri kaže: "Kada je u blagostanju, čovjek ulaže napor da bude zahvalan, a kada je u nevolji, da bude strpljiv."

Jedan od prijašnjih učenjaka je rekao: "Iman je sastavljen od dva dijela: zahvalnosti i strpljenja."

Ibn Kajjim kaže: "Budući da iman čine dvije polovine – polovinu zahvalnosti i polovinu strpljenja – obaveza je onome ko želi dobro za sebe i ko teži ka spasenju svoje duše da ne zapostavi ova dva velika temelja niti da odstupa od ova dva ispravna puta. Neka njegovo putovanje prema Allahu bude između ova dva pravca kako bi Allah učinio da bude među najboljim ljudima na Sudnjem danu."

Mutarriif b. Abdullah kaže: "Više volim da budem sačuvan od iskušenja, pa da na tome zahvaljujem, nego da budem iskušan, pa da strpljivo podnosim."

Poslanik, sallallahu alejhi ve sellem, preporučio je da molimo Allaha za oprost i selamet, a nije preporučio da tražimo i molimo za iskušenja; međutim, kada nas iskušenje zadesi, možda će iskušani postići nagradu veću od nagrade zahvalnih.

OPREZNOST U VJERI (VERA')

Opreznost u vjeri temelj je vjere, osnova pokornosti i pokazatelj čestitosti pojedinca. Pravedni prethodnici, neka im se Allah smiluje, temeljito su učili opreznost u vjeri. A ona je od izuzetne važnosti u našem vremenu, obilježenom raširenom korupcijom, konzumiranjem harama i zabranjenih stvari. Potrebno je da naš naraštaj odrasta u duhu poštenja i bogobožnosti.

Jezička definicija

S jezičkog aspekta, opreznost u vjeri označava osjećaj nelagode i suzdržavanje. Kaže se *teharredže*, tj. osjetio je nelagodu prema nečemu, suzdržao se od nečega, što znači da se klonio toga.

Osnovni koncept opreznosti u vjeri je suzdržavanje od harama, a zatim se proširuje na suzdržavanje od sumnjivih, ali i dozvoljenih stvari.

Šerijatskoterminološka definicija

Prema Ibn Kajjimu, rahimehullah, opreznost u vjeri definiše se kao ostavljanje onoga što može naštetiti na ahiretu. Drugi kažu: "To je ostavljanje onoga što nije štetno ili zabranjeno iz straha da se ne zapadne u ono što jeste."

Džurdžani je rekao: "Opreznost u vjeri jest izbjegavanje sumnjivih stvari iz straha da se ne zapadne u zabranjeno."

Temelji opreznosti u vjeri

Temelji opreznosti u vjeri nalaze se u mnogim hadisima, od kojih su:

1. Ahmed i Nesai prenose hadis Hasana b. Alija, radijallahu anhumu, u kojem kaže: "Zapamtio sam od Allahovog Poslanika, sallallahu alejhi ve sellem: 'Sustegni se od onoga što ti je sumnjivo, a drži se onoga što ti nije sumnjivo!'" (vjerodostojan po ocjeni Albanija)
2. Prenosi se od Numana b. Bešira, radijallahu anhumu, da je čuo Allahovog Poslanika, sallallahu alejhi ve sellem, kako kaže: "Halal je jasan i haram



je jasan, a između njih su sumnjive stvari za koje mnogi ne znaju jesu li dozvoljene ili zabranjene; ko se bude čuvao sumnjivih stvari, sačuvat će čistotu svoje vjere i časti. A ko zapadne u sumnjive stvari, taj je poput pastira koji svoje stado napasa pored zabranjene zone, gotovo da u nju uđe.” (muttefekun alejhi)

3. Poslanik, sallallahu alejhi ve sellem, sažeo je suštinu opreznosti u vjeri u jednoj rečenici: “U ljepotu islama ubraja se i to da se čovjek susteže od svega onoga što ga se ne tiče.” (Tirmizi i Ibn Madže; vjerodostojan po ocjeni Albanija) Ovdje sustezanje obuhvata sve što čovjeka u suštini ne treba zanimati, bilo da je riječ o govoru, pogledu, slušanju, djelovanju, hodu, razmišljanju ili bilo kojem drugom vidljivom ili skrivenom činu.

Značaj opreznosti u vjeri

Oprez u vjeri jedan je od uvjeta imana, njegov plod i pokazatelj čestitosti pojedinca. Tavus, rahimehullah, rekao je: “Vjera je poput stabla: njen korijen je šehadet, a plod oprez u vjeri. Nema dobra u stablu koje nema ploda niti u čovjeku koji nema opreznosti u vjeri.”

Ibn Omer, radijallahu anhu, rekao je: “Ne gledajte nečiji namaz niti post, već gledajte njegovu istinoljubivost u govoru, povjerljivost kada mu se nešto povjeri i opreznost u vjeri kada se suoči s iskušenjima.” (Bejheki u *Suabul-imanu*)

Omer b. Hattab, radijallahu anhu, kazao je: “Vjera se ne očituje u noćnim ibadetima, već u opreznosti u vjeri.”

Mutarriif b. Abdullah b. eš-Šihhir, rahimehullah, rekao je: “Srest ćeš dvojicu ljudi, jedan ima više posta, namaza i sadake, ali drugi je daleko bolji.” Pitali su ga: “Kako to?” Odgovorio je: “Drugi je oprezniji u vjeri Allaha radi, on izbjegava Njegove zabrane.”

Jedan je čovjek rekao Ebu Abdurrahmanu el-Amriju: “Posavjetuj me.” Ebu Abdurrahman je podigao kamenčić sa zemlje i rekao: “Da se u tvom srcu nađe opreznost u vjeri veličine ovog kamenčića, bolje ti je od namaza svih ljudi na zemlji.”

Zbog toga su učenjaci postavili opreznost u vjeri kao uvjet za suca koji presuđuje među ljudima. S obzirom na to da je suđenje jedna od najvažnijih i najuzvišenijih dužnosti na zemlji, gdje se presuđuje u pitanjima imovine, časti



i drugih ključnih stvari, postavili su uvjet da sudija mora posjedovati osobinu čestitosti i opreznosti u vjeri.

Sufjan es-Sevri, rahimehullah, kazao je: “Drži se opreznosti u vjeri i Allah će ti olakšati polaganje računa. Sustegni se od onoga što ti je sumnjivo, a drži se onoga što je jasno. Sumnju odagnaj sigurnošću, time ćeš svoju vjeru spasiti.”

Sufjan es-Sevri bio je poznat po izrazitom oprezu u vjeri. Kutejbe b. Se‘id kaže: “Da nije bilo Sufjana es-Sevrija, opreznost u vjeri bi iščeznula.”

Ebu Bekr es-Siddik i njegova opreznost u vjeri

Ebu Bekr es-Siddik, radijallahu anhu, dao je izvrstan primjer opreznosti u vjeri. Buhari u svom *Sahihu* bilježi predanje od Aiše, radijallahu anha, koja kaže: “Ebu Bekr je imao slugu koji mu je donosio prihod, a on se time koristio kao svakodnevnom opskrbi od koje je živio. Jednog je dana sluga donio nešto od čega je objedovao Ebu Bekr. ‘Znaš li kako je ovo zarađeno?’ reče mu sluga. ‘Kako?’ upita Ebu Bekr. ‘U džahilijetu sam se nekom čovjeku izdavao za vraća’, reče on, ‘a u tome uopće nisam bio vješt; prevario sam ga, a on mi je platio ovim što si sada jeo.’ Ebu Bekr je stavio ruku u usta i povratio sve što je bilo u njegovom stomaku.”

Opreznost u vjeri najbolji je podsticaj u obožavanju Allaha

Ebu Hurejre, radijallahu anhu, prenosi da je Poslanik, sallallahu alejhi ve sellem, rekao: “Ebu Hurejre, budi oprezan u vjeri, bit ćeš najpobožniji čovjek.” (Ibn Madže; vjerodostojan po ocjeni Albanija)

Seid b. Musejjib, rahimehullah, rekao je: “Ibadet je opreznost u vjeri, tj. udaljavanje od onoga što je Allah zabranio i razmišljanje o Allahovim zapovijedima.”

Razlika između asketizma (*zuhda*) i opreznosti u vjeri (*vera’a*)

Šejh Ibn Usejmin, rahimehullah, u svom tumačenju djela *Rijadus-salihin* rekao je: “Asketizam je viši nivo od opreznosti u vjeri. Opreznost u vjeri podrazumijeva napuštanje onog što šteti, dok je asketizam napuštanje onog što nije korisno. Dakle, stvari se dijele na tri kategorije: ono što donosi štetu na ahiretu, ono što donosi korist i ono što ne šteti niti koristi. Prema tome, opreznost u



vjeri jeste da se čovjek udalji od onoga što će mu nanijeti štetu na ahiretu, tj. da napusti haram, dok je asketizam udaljavanje od onoga što ne donosi korist na ahiretu.” Dakle, takvo što mu ne šteti, ali isto tako mu ne donosi nikakvu korist na ahiretu, pa asketa apstinira i od toga.

Opasnost neopreznosti u vjeri

Ibn Madže prenosi da je Poslanik, sallallahu alejhi ve sellem, rekao: “Uistinu znam ljude iz moga ummeta koji će se na Sudnjem danu pojaviti s djelima poput bijelih brda Tihame (planina, vijenac brda), pa će ih Allah u prah pretvoriti.” Sevban reče: “Allahov Poslaniče, opiši nam ih i razotkri, možda budemo od njih a da toga nismo ni svjesni.” On je rekao: “Oni su vaša braća, vaše kože, ibadete noću isto kao i vi, ali kada se osame, krše Allahove zabrane.” (Ibn Madže; vjerodostojan po ocjeni Albanija)

U Muslimovom *Sahihu* spominje se da je Poslanik, sallallahu alejhi ve sellem, govorio o čovjeku koji dugo putuje, raščupane kose i prašnjav, podiže ruke prema nebu i moli: “Gospodaru, Gospodaru!” Međutim, njegov je obrok haram, njegovo piće je haram, odjeća mu je haram i hrani se haramom, pa kako mu može biti uslišena njegova molba?

Veza znanja i opreznosti u vjeri

Ebu Su’ud, rahimehullah, rekao je: “Opreznost u vjeri u odnosu na Allahove zabrane zavisi od poznavanja onoga što je dozvoljeno i onoga što je zabranjeno, pozivajući se na ono što stoji u Kur’anu i sunnetu.”

Šejhul-islam Ibn Tejmijje, rahimehullah, rekao je o nezalici: “On ponekad ostavlja obavezne stvari, a čini zabranjene, smatrajući to oprežnošću u vjeri.”

Ove riječi kao da su izrečene u vremenu u kojem živimo, gdje, nažalost, postoji ova pojava među omladinom koja se vrati vjeri, puna poleta i energije, željna da postigne visoke stepene vjere naprečac, pa pribjegavaju “teškim” pitanjima vjere, kojima se bave veliki učenjaci čije znanje doseže visoke stepene. Nažalost, nije rijetka pojava da se takvi vrte prijašnjem (džahilijetskom) načinu života ili zalutaju u ekstremne skupine i sekte.



Primjeri opreznosti u vjeri

1. Ebu Hurejre, radijallahu anhu, prenosi od Poslanika, sallallahu alejhi ve sellem, da je rekao: "Vratim se svojim ukućanima i nađem datulu koja je pala na moj dušek, dignem je da je pojedem, ali se pobožim da nije od sadake, pa je bacim." (muttefekun alejhi)
2. Ebu Hurejre, radijallahu anhu, kaže: "Hasan b. Alija, radijallahu anhu, uzeo je jednu hurmu od sadake i stavio je u usta, pa je Vjerovjesnik, sallallahu alejhi ve sellem, rekao: 'Ostavi je! Baci je!', pa ju je on bacio. Zatim je upitao: 'Zar ne znaš da mi, zaista, ne jedemo sadaku?'"
3. Kao primjer opreznosti u vjeri navodi se ona koju je pokazala Zejneb, kći Džahša, radijallahu anha, u događaju ifka, potvore Aiše, radijallahu anha. Aiša, radijallahu anha, kazuje: "Allahov Poslanik, sallallahu alejhi ve sellem, pitao je o mom slučaju i Zejneb, kći Džahšovu: 'Šta znaš? Šta si vidjela?' 'Allahov Poslaniče', rekla je ona, 'ja čuvam svoj sluh i vid. Tako mi Allaha, ne znam ništa osim dobra.' A ona je", dalje kazuje Aiša, "jedna od Vjerovjesnikovih, sallallahu alejhi ve sellem, supruga koja se nadmetala sa mnom, ali ju je Allah sačuvao njenom oprežnošću u vjeri." (muttefekun alejhi)

Uzroci dostizanja stepena opreznosti u vjeri

1. Praktikovanje sunneta i izbjegavanje novotarija. Evzai, rahimehullah, rekao je: "Mi smo govorili da nijedna osoba neće uvesti novotariju a da mu ne bude uskraćena opreznost u vjeri."
2. Primjena znanja u praksi. Sehl b. Abdullah, rahimehullah, rekao je: "Kada vjernik primijeni znanje, ono ga vodi ka opreznosti u vjeri, a kada dosegne taj stepen, njegovo srce biva povezano s Allahom."
3. Izbjegavanje harama. Abdullah b. Mes'ud, radijallahu anhu, rekao je: "Izbjegavaj ono što ti je zabranjeno i bit ćeš među najopreznijima."
4. Izbjegavanje onoga što ometa opreznost. To uključuje prekomjerno jedenje, prepuštanje strastima, pohlepu, pretjerano pričanje, raspravljanje, bavljenje tuđim manama, gubljenje vremena i nedostatak stida. Sve to je obuhvaćeno riječima Poslanika, sallallahu alejhi ve sellem: "U ljepotu islama ubraja se i to da se čovjek susteže od svega što ga se ne tiče." (Tirmizi i Ibn Madže; vjerodostojan po ocjeni Albanija)

ZADOVOLJSTVO (*RIDA*)

Zadovoljstvo je unutarnji čin srca, jedno od najuzvišenijih i najvažnijih duhovnih stanja. Osoba može dostići visoke duhovne stepene upravo zahvaljujući ovom unutarnjem zadovoljstvu, čak i iznad onih koji zamaraju svoje tijelo i udove bez potpunog zadovoljstva.

Jezička definicija

Zadovoljstvo je stanje srca u kojem je osoba smirena i zadovoljna nečim što je primila ili doživjela bez osjećaja protivljenja.

Ridvan ili potpuno zadovoljstvo je viši stepen zadovoljstva, kao što je rečeno u Kur'anu o džennetlijama: "Gospodar njihov im šalje radosni navještaj o milosti Njegovoj i potpunom zadovoljstvu (*ridvan*).” (Et-Tevba, 21)

Šerijatskoterminološka definicija

To je nepostojanje ogorčenosti ili žaljenja zbog bilo koje Božije odredbe.

Stepeni zadovoljstva

Stepeni zadovoljstva srca razlikuju se u zavisnosti od jačine vjere pojedinca i prirode stvari prema kojima se iskazuje zadovoljstvo. Poslanik, sallallahu alejhi ve sellem, rekao je: "Osjetit će slast imana svako ko je zadovoljan da mu je Allah Gospodar, islam vjera i Muhammed vjerovjesnik.” (Muslim)

Obaveznost zadovoljstva Allahom i sudbinom

Imam Ahmed, rahimehullah, rekao je: "Devedeset ljudi među tabinima, vođama muslimana i učenjacima iz različitih pokrajina složilo se da je praksa na kojoj je umro Poslanik, sallallahu alejhi ve sellem, bila prvenstveno zadovoljstvo Božijom odredbom, prihvatanje Njegove naredbe i strpljenje na Njegovoj presudi.”



Isak, rahimehullah, rekao je: “Prisustvovao sam jednom kod Ebu Abdullaha, Ahmeda b. Hanbela, dok ga je jedan čovjek o nečemu pitao. Govorio je: ‘Ebu Abdullah, da li je glavni temelj i suština vjere muslimana vjerovanje u sudbinu, bilo dobro ili loše, milo ili gorko, predanost Božijoj odredbi i zadovoljstvo Božijom sudbinom?’ Ebu Abdullah je odgovorio: ‘Da.’”

Zadovoljstvo Allahom kao gospodarom

Ova vrsta zadovoljstva uključuje preziranje bilo kakvog drugog božanstva osim Allaha Uzvišenog. Ovo je centralna osovina islama. Allah Uzvišeni kaže: “Reci: ‘Zar da za Gospodara tražim nekog drugog osim Allaha, kad je On Gospodar svega?’” (El-En‘am, 164) Također kaže: “Reci: ‘Zar da za zaštitnika uzmem nekog drugog osim Allaha, Koji je nebesa i Zemlju stvorio.’” (El-En‘am, 14)

Ljubav i mržnja u ime Allaha također spada u zadovoljstvo Allahom kao svojim Gospodarom. Ljubav prema učenjacima proizlazi iz zadovoljstva Allahom kao Gospodarom, kao i ljubav prema pobožnima i asketima, te onima koji se zalažu za dobro i sprečavaju zlo. S druge strane, odbojnost i mržnja prema razvratnicima i grešnicima također je izraz zadovoljstva Allahom kao Gospodarom.

Zadovoljstvo islamom kao vjerom

To podrazumijeva prihvatanje svega što je Allah propisao u okviru islama. Allah kaže: “Zar da pored Allaha tražim drugog sudiju, kad vam On objavljuje Knjigu potanko?” (El-En‘am, 114) Također kaže: “Tako će biti zato što su ono što izaziva Allahovu srdžbu slijedili, a ono čime je On zadovoljan prezirali; On će djela njihova poništiti.” (Muhammed, 28)

Solidarnost s muslimanima i suprotstavljanje nevjernicima također je dio zadovoljstva islamom kao svojom vjerom.



Zadovoljstvo Muhammedom, sallallahu alejhi ve sellem, kao poslanikom

Ono podrazumijeva:

1. Da ti Poslanik, sallallahu alejhi ve sellem, bude draži od tebe samog, tvoje supruge, oca, majke, djece, prijatelja i rodbine, te da budeš spreman žrtvovati svoj život i tijelo za njega.
2. Ljubav prema učenju o njegovom životu, težnja ka usvajanju njegovih moralnih osobina i ponašanja te želja da budeš s njim u džennetu na Sudnjem danu.
3. Prihvatanje njegove presude, kao što je u Kur'anu rečeno: "I, tako Mi Gospodara tvoga, oni neće vjerovati dok za sudiju u sporovima međusobnim tebe ne prihvate, a potom u dušama svojim tegobe ne osjete za ono što si odredio i sasvim se ne predaju!" (En-Nisa, 65)
4. Zadovoljstvo onim što su Allah i Njegov Poslanik, sallallahu alejhi ve sellem, dodijelili. Uzvišeni je kazao: "A da se zadovolje onim što im daju Allah i Poslanik Njegov i da kažu: 'Dovoljan nam je Allah, Allah će nam dati iz obilja Svoga, a i Poslanik Njegov, i mi, zaista, ka Allahu žudimo.'" (Et-Tevba, 59)
5. Slijedenje njegove prakse i izbjegavanje uvođenja novotarija u vjeru koje nemaju osnovu u Allahovoj objavi.
Uvođenje novih praznika, mevluda, oblika zikra i ibadeta nije znak zadovoljstva Muhammedom, sallallahu alejhi ve sellem, kao poslanikom.

Zadovoljstvo Allahovom odredbom

Zadovoljstvo Allahovom odredbom podrazumijeva potpunu predanost i mir srca prema sudbini i Allahovoj odluci, jer sve što Allah odredi je pravedno, dobro i mudro.

Djela koja nisu oprečna zadovoljstvu Allahovom odredbom

1. Osjećaj boli i neprijatnosti. Iako je položaj Poslanika, sallallahu alejhi ve sellem, najuzvišeniji u pogledu zadovoljstva Allahovom odredbom, i on je plakao kada je njegov sin Ibrahim umro te rekao: "Zaista oko samo suzi, a



srce tuguje. Mi ne govorimo ono što izaziva srdžbu našeg Gospodara. Mi smo, uistinu, Ibrahime, ožalošćeni zbog rastanka s tobom.” (muttefekun alejhi)

Ibn Hadžer, rahimehullah, kaže: “Pokazivanje tuge kada čovjeka zadesi nesreća ne isključuje njegovu strpljivost i zadovoljstvo, ukoliko je njegovo srce smireno.”

2. Kazivanje o onom što doživiš od nevolja, ali ne iz ogorčenosti ili prigovaranja. Kurtubi kaže: “Dozvoljeno je ispoljiti osjećaj bola i bolesti a da to ne umanjuje zadovoljstvo Allahovom sudbinom i prihvatanje Njegove odredbe, pod uvjetom da to nije prouzrokovano ogorčenošću ili nezadovoljstvom.”
3. Upućivanje dove Allahu Uzvišenom da otkloni nevolju. Allah spominje priču o poslaniku Ejjubu, alejhi selam, koji se obratio svom Gospodaru riječima: “I Ejjuba, kada je Gospodaru svome zavapio: ‘Mene je nevolja snašla, a Ti si Milosnik najmilostiviji.’” (El-Enbija, 83)

Uvjeti dostizanja stepena zadovoljstva

1. Istinsko poznavanje Allaha Uzvišenog i čvrsto uvjerenje u Njega te spoznaja da je Allah mudar u svim Svojim odlukama i odredbama. Fudajl, rahimehullah, kaže: “Najviše pravo na zadovoljstvo Allahom imaju oni koji Ga najbolje poznaju.” Džunejd, rahimehullah, kaže: “Zadovoljstvo je proporcionalno snazi znanja i čvrstini spoznaje.”

Pojedini dobri prethodnici upitani su kako postići stepen zadovoljstva, pa su odgovorili: “Srcem koje je svjesno da je Gospodar pravedan u Svojoj odredbi i koje u Njega ne sumnja.”

2. Ustrajnost u strpljenju i pripremanje duše za sve što je zadesi od Allahovih odredbi. Allah kaže: “Zato, otrpi njihove riječi i Gospodara svoga slavi, hvaleći Ga, prije izlaska Sunca i prije zalaska njegova, i slavi Ga u noćnim časovima, i na krajevima dana, da bi bio zadovoljan.” (Ta-ha, 130)

Jedna od činjenica koje olakšavaju postizanje zadovoljstva jeste spoznaja da nema bijega od zadovoljstva. Onaj ko nije zadovoljan ne dobije ništa ni na ovom ni na budućem svijetu, za razliku od onoga ko je zadovoljan, koji ostvaruje dobrobit na oba svijeta.



Pjesnik je kazao:

*Naviknimo duše svoje na strpljenje lijepo,
zadovoljstvo sudbinom Njegovom potrebno je prijeko.*

3. Dova Allahu Uzvišenom. Zejd b. Sabit, radijallahu anhu, prenosi da ga je Poslanik, sallallahu alejhi ve sellem, podučio jednoj dovi, naredivši mu da je svakodnevno uči, te da isto učini i porodica njegova. U toj dovi, između ostalog, stoji: "Allahu moj, molim Te za zadovoljstvo odredbama Tvojim." (Ahmed i Hakim, koji su ocijenili lanac prenosilaca vjerodostojnim)

Plodovi zadovoljstva

1. Dostizanje stepena robovanja i zahvalnosti. Kada je Jahja b. Muaz upitan: "Kada rob doseže stepen zadovoljstva?", odgovorio je: "Kada svoj odnos prema Gospodaru zasnuje na četiri osnove, tj. da kaže: 'Ako mi Ti Gospodaru daš, prihvatam; ako mi uskratiš, zadovoljan sam; ako me ostaviš, obožavam Te; ako me pozoveš, odazivam Ti se.'"

Ibn Aun, rahimehullah, kaže: "Budi zadovoljan Allahovom odredbom, bila to teškoća ili olakšica. Uistinu to umanjuje tvoju brigu i povećava tvoju nagradu na ahiretu."

2. Postizanje časti, ponosa i bogatstva duše. Ramahurmuzi, rahimehullah, kaže: "Ko uzme od dunjaluka ono što mu je dato s umjerenošću i zadovoljstvom, živjet će, tom svojom časnom dušom i zadovoljstvom, lijepim životom. A onaj ko stalno žudi za svime što vidi od užitaka sličan je životinji koja jede dok se ne zasiti, zatim preživa hranu, pa se ponovo vraća jelu, ne poznajući ništa drugo."
3. Blagoslov i bereket u opskrbi, zadovoljstvo i spas, lijep život i olakšanje u iskušenjima. Jedan od prethodnika kaže: "Allah iskušava Svoga roba onim što mu je dao. Ko bude zadovoljan Allahovom odredbom, Allah će mu u tome dati bereket, blagosloviti ga i povećati mu opskrbu, a ko ne bude zadovoljan, Uzvišeni Allah će mu uskratiti blagoslov u njegovoj opskrbi."

Eksem b. Sajfi, rahimehullah, kazao je: "Ko bude zadovoljan onim što mu je Allah odredio, živjet će lijepim životom. Ko bude zadovoljan svojim stanjem i onim što ima, živjet će radosnim životom."



Zadovoljstvom se postiže rasterećenje i oslobađanje od briga, tjeskobe, tuge, nemira u srcu, loših okolnosti, sumnji i nesigurnosti.

4. Ulazak u džennet. Ebu Seid el-Hudri, radijallahu anhu, prenosi da je Poslanik, sallallahu alejhi ve sellem, rekao: "Ebu Seide, ko bude zadovoljan da mu je Allah gospodar, islam vjera i Muhammed poslanik, džennet mu je zagaraniran." Ebu Seid je bio zadivljen ovim riječima, pa je zamolio Poslanika, sallallahu alejhi ve sellem, da ih ponovi, što je on i učinio. (Muslim)
5. Stjecanje Allahovog zadovoljstva i spas od Njegove srdžbe. Allahov Poslanik, sallallahu alejhi ve sellem, kaže: "Nema muslimana koji ujutro i navečer tri puta kaže: 'Zadovoljan sam da mi je Allah gospodar, islam vjera i Muhammed vjerovjesnik' a da ne ostvari pravo kod Allaha da mu ugodni Sudnjem danu." (Ahmed; vjerodostojan uz druga predanja po ocjeni Arnauta)

Enes b. Malik, radijallahu anhu, prenosi da je Poslanik, sallallahu alejhi ve sellem, rekao: "Kada Allah zavoli jedan narod, on ih iskuša, pa ko bude zadovoljan, zadobit će Allahovo zadovoljstvo, a ko bude nezadovoljan, zadobit će Allahovu srdžbu." (Tirmizi; vjerodostojan po ocjeni Albanija)

6. Oprost grijeha. Prenosi se od Sa'da b. Ebi Vekkasa, radijallahu anhu, da je Poslanik, sallallahu alejhi ve sellem, rekao: "Ko nakon ezana izgovori: 'I ja svjedočim da nema boga osim Allaha Jednoga Koji nema druga i da je Muhammed Njegov rob i poslanik, zadovoljan sam da mi je Allah Gospodar, Muhammed poslanik i islam vjera', bit će mu oprošteni njegovi grijesi." (Muslim)
7. Zadovoljstvo je uzrok svakog dobra. Omer b. Hattab, radijallahu anhu, pisao je Ebu Musau, radijallahu anhu: "Uistinu se sve dobro postiže zadovoljstvom. Budi zadovoljan, a ukoliko nisi u mogućnosti, strpi se."

Ibn Kajjim, rahimehullah, rekao je: "Zadovoljstvo i ljubav pokreću roba, čak i kada leži na postelji, što ga postavlja na mnogo više mjesto od ostalih."

RAZMIŠLJANJE (TEFEKKUR)

Razmišljanje je jedna od najuzvišenijih i najplemenitijih radnji, stoga su dokazi iz Kur'ana i sunneta raznoliki glede ukazivanja na obavezu dubokog razmišljanja. To je ugodna i lijepa aktivnost, veoma dragocjena onima koji su je spoznali i tim darom obdareni.

Duboko razmišljanje podrazumijeva razmišljanje o značenjima Božijih imena i atributa, promišljanje o mudrostima koje je donio Poslanik, sallallahu alejhi ve sellem, razmišljanje o ahiretu i onome što koristi ljudima u njihovoj vjeri i svakodnevnom životu.

Jezička definicija

Razmišljanje je upotreba razuma i srca radi kontinuiranog promišljanja o nečemu, tj. usmjeravanje misli na ono što vodi do pouke ili razumijevanja.

Šerijatskoterminološka definicija

Razmišljanje srcem i razumom o Allahovim stvorenjima i znakovima radi učvršćivanja imana i približavanja Allahu.

Najkorisnije razmišljanje

Korisno razmišljanje jeste ono koje čovjeka vodi ka dobrobiti, bilo na ovome ili na budućem svijetu. Ibn Kajjim kaže: "Najkorisnije je razmišljati o dobrobiti na ahiretu i kako je postići te o udaljavanju od onoga što će nam nanijeti štetu na ahiretu i kako to izbjeći. Ovo su četiri najvažnije stvari o kojima treba razmišljati. Zatim slijede druge četiri: razmišljanje o koristima dunjaluka i načinima njihova postizanja, te ovosvjetskim štetama i načinima njihova izbjegavanja. Oko ovih osam stvari kreće se promišljanje razumnih ljudi."



Područja razmišljanja

1. Razmišljanje o tekstovima Objave, znakovima i primjerima

Allah Uzvišeni kaže: “A tebi spuštamo Opomenu, da bi objasnio ljudima ono što im se objavljuje, i da bi oni razmislili.” (En-Nahl, 44)

Također kaže: “Da ovaj Kur'an kakvom brdu objavimo, ti bi vidio kako je strahopoštovanja puno i kako bi se od straha pred Allahom raspalo. Takve primjere navodimo ljudima da bi razmislili.” (El-Hašr, 21)

2. Razmišljanje o stvorenjima

Uzvišeni Allah kaže: “A koliko ima znakova na nebesima i na Zemlji pored kojih prolaze, i tom prilikom se od njih okreću! Većina njih ne vjeruje u Allaha, osim tako što Mu druge pridružuju.” (Jusuf, 105-106)

U Muslimovoj *Zbirci vjerodostojnih hadisa* prenosi se da je Poslanik, sallallahu alejhi ve sellem, ustao u posljednjem dijelu noći, izašao i pogledao u nebo, a zatim proučio: “U stvaranju nebesa i Zemlje, i u izmjeni noći i dana, doista su znakovi za razumom obdarene, koji Allaha spominju stojeći, sjedeći i ležeći na svojim bokovima, i o stvaranju nebesa i Zemlje razmišljaju. ‘Gospodaru naš, Ti ovo nisi uzalud stvorio! Uzvišen si Ti i sačuvaj nas od patnje u Vatri!’” (Alu Imran, 190-191) Potom se vratio kući, uzeo misvak i abdestio se, pa klanjao. Zatim je opet legao, pa ponovo učio isti ajet. Potom je ustao, ponovo upotrijebio misvak, abdestio se i klanjao. Imam Nevevi, rahimehullah, komentarišući ovaj hadis, kazao je: “Ovdje se preporučuje učenje ovog ajeta prilikom buđenja u toku noći, uz pogled u nebo, zbog njegovog velikog značaja za razmišljanje.”

Šejhul-islam Ibn Tejmije, rahimehullah, kaže: “Posmatranje nebeskih i zemaljskih stvorenja s ciljem razmišljanja i izvlačenja pouka je traženo i po-hvalno djelo.”

Čovjek se u promišljanju treba koristiti i eksperimentalnim i prirodnim naukama. Koliko li je samo stvorenja koja naši preci nisu poznavali, a nama su danas poznata! Uzvišeni Allah kaže: “A stvorit će i ono što ne znate.” (En-Nahl, 8)

3. Razmišljanje o Allahovim blagodatima

Allah Uzvišeni kaže: “On je Taj Koji s neba spušta vodu koju pijete i ona pomaže da iznikne bilje kojim stoku napasate. On vam daje da pomoću nje iznikne žito, i masline, i palme, i grožđe, i svakovrsni plodovi – u tome je,



zaista, znak za ljude koji razmišljaju. On vam je potčinio noć i dan, i Sunce i Mjesec, i zvijezde su po odredbi Njegovoj potčinjene. U tome su, uistinu, znakovi za ljude koji razumiju; – i sve što vam je na Zemlji šaroliko stvorio – u tome je, doista, znak ljudima koji se prisjećaju i pouku uzimaju. I On je Taj Koji je more potčinio, da iz njega svježe meso jedete i da vadite nakit koji nosite – ti vidiš lađe kako ga sijeku da biste tragali za Njegovim obiljem i da biste zahvaljivali.” (En-Nahl, 10-14)

4. Razmišljanje o posljedicama djela i ahiretu

Uzvišeni Allah kaže: “Zašto ne putuju po Zemlji pa da vide kakav je bio završetak onih prije njih?! Oni su bili od njih jači i zemlju su obrađivali i izgrađivali je više nego što je izgrađuju ovi, i poslanici su im donosili jasne dokaze: Allah im sigurno nije zulum činio, međutim, sami su sebi zulum činili.” (Er-Rum, 9)

Prenosi se od Alije b. Ebi Taliba, radijallahu anhu, da je Poslanik, sallallahu alejhi ve sellem, rekao: “Ranije sam vam zabranio da posjećujete mezare, ali ih (sada) posjećujte, jer to vas podsjeća na budući svijet (ahiret).” (Ahmed; vjerodostojan po ocjeni Albanija)

Mutarriif b. Abdullah b. Šikkhir, rahimehullah, rekao je: “Kada noću legnem u postelju, razmišljam o Kur'anu i uspoređujem svoja djela s djelima stanovnika dženneta. Primjećujem da su njihova djela veoma teška: ‘Noću su samo malo spavali’ (Ez-Zarijat, 17); ‘I oni koji provode noći pred Gospodarom svojim na sedždu padajući i stojeći’ (El-Furkan, 64); ‘Zar je takav kao onaj koji u noćnim satima u molitvi vrijeme provodi.’ (Ez-Zummer, 9) Ne vidim sebe među njima, pa se suočavam s ajetom: ‘Šta vas je u Sekar dovelo?’ (El-Muddessir, 42), gdje primjećujem da se govori o poricateljima, pa dolazim do ajeta: ‘A ima i drugih koji su grijehе svoje priznali, i koji su djela dobra s drugim koja su loša izmiješali; njima će Allah oprostiti – Allah je, zaista, Onaj Koji oprašta grijehе i milostiv je’ (Et-Tevba, 102), i nadam se da sam ja, i vi, braćo moja, među njima.”



Granice razmišljanja i zone opreza

Razmišljanje ima granice koje musliman treba poštivati kako ne bi zalazio u područja koja su izvan dosega ljudskog razuma. Među tim granicama su:

1. Allahovo biće i kakvoća Njegovih svojstava

Muslimanu nije dozvoljeno razmišljati o kakvoći Allahovog bića ili o tome kako izgledaju Njegove osobine. Prenosi se od Ibn Omera, radijallahu anhu, da je Poslanik, sallallahu alejhi ve sellem, rekao: “Razmišljajte o Allahovim stvorenjima, a nemojte razmišljati o Allahu Uzvišenom.” (Lalikai; dobar po ocjeni Albanija)

Razmišljanje o značenjima Allahovih imena i osobina te djelovanje u skladu s istim, bez ulaska u pitanja kakvoće, preporučeno je i u skladu s tekstovima.

2. Nevidljivi svijet (*gajb*)

Muslimanu nije dopušteno razmišljati o nevidljivom svijetu i pokušavati ga zamisliti, jer je to iznad mogućnosti ljudskog razuma. Ovdje se razlikuje islamski pogled od zapadnjačkog ateističkog pogleda koji, u svojoj oholosti i uobraženosti, smatra da je moguće sve ispitati i razumjeti. Islam postavlja granice i priznaje postojanje stvari koje se ne mogu saznati niti razumjeti. To su granice koje se ne mogu prekoračiti, kao što su duša, svijet džina, svijet meleka, kabur, džehennem, džennet, Sudnji dan i njegove faze. Sve su to stvari gajba koje se ne mogu razumom dokučiti. Allah Uzvišeni kaže: “I pitaju te o duši. Reci: “Duša je nešto što samo Gospodar moj zna, a vama je od znanja samo malo dato.” (El-Isra, 85)

Praksa dobrih predaka u razmišljanju

Kada su pitali suprugu Ebu Zerra o njegovom ibadetu, rekla je: “On je cijeli dan provodio u samoći, razmišljajući.” Kada su pitali suprugu Ebu Derda’a o najboljem ibadetu njenog muža, ona je odgovorila: “Razmišljanje i uzimanje pouke.” Dok je Sufjan es-Sevri, rahimehullah, jednom prilikom bio u društvu, desilo se da se svijeća ugasila, a soba je pala u potpunu tamu. Kada su ponovo upalili svijeću, vidjeli su Sufjana kako plače, a suze mu iz očiju liju. Pitali su ga: “Zašto plačeš?” A on je odgovorio: “Sjetio sam se kabura.”



Rekli su Ibrahimu en-Nehaiju: “Dugo razmišljaš”, a on je odgovorio: “Razmišljanje je srž uma.”

Plodovi razmišljanja

1. Povećanje i učvršćivanje vjerovanja. Halifa el-Abdi, rahimehullah, rekao je: “Tako mi Allaha, vjernici su uvijek razmišljali o onome što je stvorio njihov Gospodar, tako da su njihova srca postala čvrsta u vjerovanju u Njega.”
2. Posvećenost djelovanju za ahiret i odricanje od dunjaluka. Ibn Abbas, radijallahu anhu, rekao je: “Razmišljanje o dobru vodi ka njegovom ostvarivanju, a kajanje zbog grijeha vodi njegovom napuštanju.”

Ibn Kajjim, rahimehullah, rekao je: “Razmišljanje vodi ka ljubavi i znanju. Ako čovjek razmišlja o veličini i vječnosti ahireta, a o prolaznosti dunjaluka, to će mu izazvati želju za ahiretom i skromnost spram dunjaluka. Što više razmišlja o kratkoći života i ograničenosti vremena, to će ga potaknuti na ozbiljnost, trud i ulaganje napora u iskorištavanju vremena.”

3. Strah od Allaha i svijest o Njegovoj veličini. Bišr b. Haris, rahimehullah, rekao je: “Kada bi ljudi razmišljali o Allahovoj veličini, nikada Mu ne bi bili nepokorni.”

Također je rečeno: “Razmišljanje uklanja nemar i budi strahopoštovanje u srcu.”

4. Spoznaja stanja duše i težnja ka njenom popravljanju. Kazao je Fudajl, rahimehullah: “Razmišljanje je ogledalo koje ti pokazuje tvoje dobre i loše osobine.”
5. Prosperitet islamskog ummeta. Reformatori i obnovitelji u povijesti islamskog ummeta prvo su promišljali o stanju muslimana, o tome šta im nedostaje, gdje su počinjene greške i koje su slabosti. Nakon toga su se s ozbiljnošću i trudom posvetili poboljšanju stanja ummeta, vraćajući ga na put ka Njegovom zadovoljstvu.
6. Naučna postignuća. Imam Šafija, rahimehullah, rekao je: “Pomozite svoj govor šutnjom kako bi bio odmjeren i kvalitetan, a svoje zaključivanje promišljanjem.”

Kako su učenjaci ostvarili tolika postignuća, napisali mnoge knjige i razvili nauke? Zasigurno je veliki dio toga rezultat promišljanja i razmatranja.



7. Pokajanje, oprost i milost. Sufjan b. Ujejne često je citirao stih:

Kome razmišljanje ide na ruku, u svemu će pronaći pouku.

I govorio je: “Razmišljanje je ključ milosti; zar ne vidiš da čovjek promišlja, pa se i pokaje!”

Vrijednost razmišljanja

Razmišljanje je jedna od najboljih vrsta ibadeta. Ebu Derda, radijallahu anhu, rekao je: “Kratko razmišljanje bolje je od noći provedene u noćnom namazu.”

Ibn Abbas, radijallahu anhu, kazao je: “Dva umjerena rekata s promišljanjem bolja su od noćnog namaza u kojem je srce odsutno.”

Muhammed b. Ka'b el-Kurazi, rahimehullah, rekao je: “Da proučim noću sure Ez-Zilzal i El-Kari'a i ponavljam ih razmišljajući o njihovim značenjima, draže mi je nego da cijelu noć čitam Kur'an brzo i bez razmišljanja.”

Sredstva postizanja ispravnog razmišljanja

1. Traženje zaštite od šejtana

Jedan od ključnih razloga za ispravno razmišljanje i promišljanje jeste traženje zaštite od šejtana. Allah, subhanehu ve te'ala, uputio nas je da tražimo da nas zaštititi od Iblisa prije učenja Kur'ana, jer je razmišljanje o kur'anskim ajetima jedno od najvažnijih vidova razmišljanja. Traženje zaštite prije početka učenja Kur'ana pomaže da se šejtan udalji i ne ometa promišljanje.

Ibn Kesir, rahimehullah, rekao je: “Svrha traženja zaštite na početku učenja Kur'ana jeste da se ne dozvoli šejtanu da zbuni onoga ko uči, da mu ne pomiješa misli i ne spriječi ga u razmišljanju.”

2. Udaljavanje od grijeha

Allah kaže: “Odvratiću od znamenja Svojih one koji se, bez ikakva osnova, na Zemlji ohole. I kakav god dokaz oni vide, neće u njega vjerovati; ako vide Pravi put – neće ga kao put prihvatiti, a ako vide stranputicu – kao put će je prihvatiti. To je zato što znakove Naše poriču i što su prema njima ravnodušni.” (El-A'raf, 146) Hasan el-Basri, rahimehullah, u tumačenju ovog ajeta rekao je: “Bit će uskraćeni za mogućnost promišljanja o Allahovim odredbama.”

SAMOOBRAČUN (MUHASABA)

Duša je po prirodi prevrtljiva, sklona promjenama, podložna utjecajima, a strasti i bolesti često je zavode. U osnovi, duša navodi čovjeka na zlo, kao što Uzvišeni Allah kaže: “Ja ne pravdam sebe, duša je zaista sklona zlu, osim one kojoj se Gospodar moj smiluje. Gospodar moj je, zaista, Onaj Koji oprašta grijeha i milostiv je.” (Jusuf, 53) Stoga, duša predstavlja veliku opasnost za pojedinca ukoliko se ne zaustavi na svojim granicama, ukroti strahom od Allaha i učvrsti na stazi bogobožnosti i pravde.

Jezička i šerijatskoterminološka definicija

U jezičkom smislu, obračun označava brojanje, dok u terminološkom smislu podrazumijeva razmatranje vlastitih djela, ispravljanje grešaka i nastavak hoda pravim putem.

El-Maverdi o samoobračunu kaže: “Čovjek bi trebao svake večeri preispitati svoja djela iz prethodnog dana. Ako su pohvalna, neka ustraje i nastavi njima slična djela činiti. Ako su krnjava, neka ih ispravi koliko može i izbjegava slične greške ubuduće.”

Samoobračun u Kur'anu i sunnetu

Uzvišeni Allah poziva Svoje robove na samoobračun: “O vi koji vjerujete, Allaha se bojte, i neka svaki čovjek gleda šta je za sutra pripremio, i Allaha se bojte. Allah, zaista, u potpunosti zna ono što radite. I ne budite kao oni koji su zaboravili Allaha, pa je On učinio da sami sebe zaborave; to su pravi grešnici.” (El-Hašr, 18-19)

Šejh Sa'di tumači ovaj plemeniti ajet kao osnovu za samoobračun svakog vjernika. Kazao je: “Vjernik treba preispitivati sebe; ako primijeti grešku, neka se od nje udalji iskrenim pokajanjem i neka izbjegava uzroke koji vode do nje. Ako primijeti da je nemaran u obavljanju Allahovih naredbi, neka uloži trud i traži pomoć od Gospodara da upotpuni i usavrši svoje obaveze.”



Uzvišeni Allah, također, kaže: "I kunem se dušom koja sebe kori." (El-Kijame, 2)

Hasan el-Basri, tumačeći ovaj ajet, kaže: "Vjernik se uvijek preispituje: Šta sam htio reći ovom riječju? Šta sam namjeravao ovim zalogajem? Šta sam mislio ovim pićem? A grešnik ide naprijed kroz život bez ikakvog preispitivanja."

U hadisu koji prenosi Šeddad b. Evs, radijallahu anhu, stoji da je Allahov Poslanik, sallallahu alejhi ve sellem, rekao: "Pametan je onaj ko svoju dušu potčini i radi za život poslije smrti (tj. preispitujući se na ovom svijetu), a slabij je onaj koji se prepusti svojim strastima polazući nadu u Allahov oprost." (Ahmed i Tirmizi, koji ga ocjenjuje dobrim)

Samoobračun je djelo o kojem postoji konsenzus uleme. Izz b. Abdusselam, rahimehullah, kaže: "Učenjaci su jednoglasni o obavezi samoobračunavanja i razmatranja djela iz prošlosti i budućnosti."

Vrste samoobračuna

Dvije su vrste samoobračuna:

1. Prije učinjenog djela

Vjernik treba razmotriti svoje mogućnosti i sposobnosti prije nego što pristupi djelu. Ako je sposoban, neka ga izvrši, poput posta ili noćnog namaza, a ako nije, neka ga ostavi. Zatim treba razmotriti ima li to djelo koristi za ovaj i budući svijet, te ga u skladu s tim izvršiti ili ostaviti. Također, treba provjeriti da li je djelo učinjeno radi Allaha ili radi ljudi. Ako je radi Allaha, neka ga izvrši; ako je radi ljudi, neka ga ostavi.

Hasan el-Basri kaže: "Jedan (od dobrih prethodnika) bi, kada bi htio dati sadaku, zastao i preispitao se: ako je to želio učiniti radi Allaha, izvršio bi ono što je naumio, a ako nije, ne bi to učinio."

2. Nakon izvršenog djela

Samoobračun nakon izvršenog djela dijeli se na tri vrste:

- a. Samoobračun u vezi s izvršenjem ibadeta. Vjernik treba preispitivati svoje izvršavanje obaveza, da li je obavio farzove iskreno, u potpunosti, i u skladu s onim što je preneseno od Allahovog Poslanika, sallallahu alejhi ve sellem. Također, treba razmotriti svoje postupanje prema



dobrovoljnim ibadetima, da li je zanemario neke nafilje, propustio učenje Kur'ana ili svakodnevno spominjanje Allaha.

Učinkovitost ove vrste samoobračuna ogleda se u tome da, ukoliko je došlo do propusta, treba raditi na kompenzaciji i ispravljanju, požuriti sa činjenjem dobrih djela, kloniti se zabrana i grijeha, pokajati se i često tražiti oprost.

- b. Samoobračun u vezi s počinjenim grijesima i lošim djelima. Vjernik preispituje svoje postupke u vezi s počinjenim grijesima i nedjelima. Razmatra zašto je to učinio i kako je mogao izbjeći pad u grijeh. Nakon ove analize prelazi na konkretne korake za ispravljanje situacije, a to uključuje iskreno pokajanje, traženje oprosta i činjenje dobrih djela koja brišu loša, oslanjajući se na Allahovu riječ: "Dobra djela zaista poništavaju hrdava." (Hud, 114)
- c. Samoobračun u vezi s dozvoljenim djelima. Vjernik se pita o djelima čije bi izbjegavanje bilo bolje od njihovog činjenja ili o dopuštenim djelima koja su možda bila nepotrebna. Postavlja sebi pitanja: Zašto sam to učinio? Da li bi bilo bolje da sam to izbjegao? Kakvu sam korist imao od toga? Da li ovo djelo povećava moja dobra djela?

Plodovi samoobračuna

1. Spas i uspjeh. Hasan el-Basri je rekao: "Čovjek je u dobrom stanju sve dok ima savjetnika u samome sebi i dok mu je samoobračun prioritet."
2. Lakše polaganje računa na Sudnjem danu. Omer b. Hattab, radijallahu anhu, rekao je: "Svedite račun sami sa sobom prije nego što budete za svoja djela pitani, jer vam je to lakše za polaganje računa, i važite svoja djela prije nego što budu vagana, jer je to lakše za vas, i pripremite se za Veliki dan." Hasan el-Basri također je rekao: "Vjernik stalno sam sebe preispituje, bojeći se Allahovog obračuna. Lako polaganje računa će biti onima koji su sami sa sobom račun svodili na dunjaluku, a težak obračun na Sudnjem danu će biti onima koji su zanemarili samoobračun na dunjaluku."
3. Očuvanje vjere i zaštita od licemjerstva i nemoralna. Fudajl b. 'Ijad, rahi-mehullah, rekao je: "Vjernik preispituje sebe, svjestan da će stajati pred



Allahom Uzvišenim, dok licemjer zanemaruje samog sebe. Neka se Allah smiluje robu koji preispita sam sebe prije nego što mu dođe melek smrti.”

4. Otkrivanje nedostataka i mana duše te izbjegavanje obmanjivanja dobrim djelima. Abdulaziz b. Ebi Ravvad, rahimehullah, kazao je: “Nikada nisam učestvovao u nekom dobrom djelu a da nakon njega nisam preispitao samog sebe i otkrio da je udio šejtana u njemu bio veći nego udio posvećen Allahu Uzvišenom.”
5. Poniznost pred Allahom i spoznaja vlastitih ograničenja. Muhammed b. Vasi‘, rahimehullah, običavao je reći: “Kad bi grijesi imali miris, niko ne bi mogao sjediti pored mene!” Iako je bio jedan od najvećih pobožnjaka ovog ummeta.
6. Efikasno korištenje vremena. Samoobračun vodi čovjeka ka najboljem iskorištavanju vremena. Ibn Asakir, rahimehullah, rekao je: “Ebu Feth Nasr b. Ibrahim el-Makdisi preispitivao je svaki svoj dah; nije dopuštao da mu ijedan trenutak prođe beskorisno. Prepisivao bi djela, podučavao ili čitao.”

Primjeri samoobračuna kod pravednih prethodnika

1. Enes b. Malik, radijallahu anhu, prenosi: “Izašao sam s Omerom b. el-Hattabom, radijallahu anhu, dok nismo ušli u jedan vrt. Čuo sam ga kako, u dubini vrta, dok je između mene i njega bio zid, obraćajući se svojoj duši govori: ‘E moj Omere b. el-Hattabe, vođo pravovjernih! Tako mi Allaha, ili ćeš se bojati Allaha ili će te kazniti!’”
2. Kada je jedne prilike Omer propustio klanjati ikindijski namaz u džematu, dao je u sadaku zemlju vrijednu dvjesto hiljada dirhema.
3. Ibn Omer, radijallahu anhu, ako bi propustio namaz u džematu, provodio bi cijelu noć u ibadetu.
4. Omer b. Abdulaziz, rahimehullah, jednom je odgodio akšam-namaz tako da su se pojavile dvije zvijezde, pa je oslobodio dva roba, iako vrijeme namaza još nije bilo isteklo.
5. Ibn Ebi Rebi‘a, rahimehullah, propustio je dva rekata sabahskih sunneta, pa je oslobodio roba.
6. Ibn Avn, rahimehullah, kada ga je majka zovnula, odgovorio joj je glasom višim od njenog, pa je oslobodio dva roba.

OSLANJANJE NA ALLAHA (*TEVEKKUL*)

Oslanjanje na Allaha Uzvišenog jedan je od najvažnijih uzroka uspjeha, a ujedno je čin koji Allah voli i s kojim je zadovoljan. To je jedan od najviših stepena tevhida (monoteizma) i ključni element koji vjernik treba primijeniti na svom putu prema Allahu Uzvišenom, kako je Uzvišeni rekao: “Samo Tebi ibadet činimo i samo od Tebe pomoć molimo.” (El-Fatiha, 5)

Jezička definicija

Tevekkul je pouzdanje i oslanjanje na nekog ili nešto u ostvarivanju cilja ili pri suočavanju s problemom.

Šerijatskoterminološka definicija

Oslanjanje na Allaha u terminološkom smislu, kako je rekao Zebidi, rahimehullah, znači: “Tevekkul je povjerenje u ono što je kod Allaha i neočekivanje onoga što je u rukama ljudi.”

Ibn Usejmin, rahimehullah, rekao je: “Tevekkul je iskreno oslanjanje na Allaha Uzvišenog u postizanju koristi i otklanjanju štete, uz činjenje uzroka koje je Allah naredio.”

Uzvišeni Allah je u mnogim ajetima Svoje Knjige potaknuo vjernike na oslanjanje na Njega:

“A u Allaha se pouzdajte, ako ste vjernici.” (El-Maida, 23)

“I neka se vjernici samo u Allaha pouzdaju!” (Et-Tevba, 51)

“Onome koji se u Allaha pouzdaje, On mu je dovoljan.” (Et-Talak, 3)

“A kada se odlučiš, na Allaha se osloni; Allah, doista voli one koji se na Njega oslanjaju.” (Alu Imran, 159)



Allah Uzvišeni opisuje Svoje vjernike hvaleći ih:

“Pravi su vjernici samo oni čija se srca strahom ispune kad se Allah spomene, a kad im se ajeti Njegovi uče, vjerovanje im povećaju i samo se na Gospodara svoga oslanjaju.” (El-Enfal, 2)

Stepen oslonca na Allaha u vjeri

Ibn Kajjim, rahimehullah, rekao je: “Oslanjanje na Allaha Uzvišenog polovina je vjere, dok je druga polovina iskreno obraćanje Allahu (*inaba*), jer vjera je traženje pomoći od Allaha i ibadet. Oslonac je traženje pomoći, dok iskreno obraćanje Allahu označava ibadet.”

Oslonac na Allaha jedan je od temelja tevhida uluhijjeta, tj. obožavanja jedino Allaha Uzvišenog, što potvrđuje i ajet: “Samo Tebi ibadet činimo i samo od Tebe pomoć molimo.” (El-Fatiha, 5)

Bez oslonca nema imana

Uzvišeni Allah kaže: “A u Allaha se pouzdajte, ako ste vjernici.” (El-Maida, 23)

Znaj da onaj ko povjeri svoje poslove Allahu i zadovoljan je onim što mu Allah odredi i izabere, ostvaruje oslonac na Njega. Nasuprot tome, onaj ko povjeri svoje poslove nekome drugom mimo Allaha i srce veže za nekog drugog, prepušten je sam sebi i udaljen je od svog Gospodara Uzvišenog.

Ibn Mesud, radijallahu anhu, prenosi da je Allahov Poslanik, sallallahu alejhi ve sellem, rekao: “Koga zadesi bijeda, pa od svijeta bude tražio da mu tu bijedu otkloni, nikada je neće prevladati, a koga snađe bijeda, pa se Allahu obrati, opskrba od Allaha gotovo da mu je stigla.” (Ahmed, Ebu Davud i Tirmizi ocijenivši ga vjerodostojnim)

Izreka “Dovoljan nam je Allah, divan li je On zaštitnik”

Ibn Abbas, radijallahu anhu, prenosi: “‘Dovoljan nam je Allah i divan li je On zaštitnik’ su riječi koje je izgovorio Ibrahim, alejhi selam, kada je bio bačen u vatru. Ovu izreku izgovorio je i Muhammed, sallallahu alejhi ve sellem, kada su rekli: ‘Ljudi su se sakupili protiv vas, pa ih se bojte’, ali im je to samo povećalo vjerovanje, te su rekli: ‘Dovoljan nam je Allah i divan li je On zaštitnik.’” (Buhari)



Značaj poduzimanja uzroka

Uzvišeni Allah podučio je Svoje robove važnosti poduzimanja uzroka: “On vam je Zemlju pogodnom učinio, pa hodajte predjelima njezinim i hranite se onim što On daje, ali Njemu se sve vraća.” (El-Mulk, 15)

Slično tome, i Njegov Poslanik, sallallahu alejhi ve sellem, podučavao je ovom principu. Prenosi Enes b. Malik, radijallahu anhu, da je jedan čovjek rekao: “Allahov Poslaniče, da li da vežem svoju devu i oslonim se na Allaha, ili da je pustim i oslonim se na Allaha?” Poslanik, sallallahu alejhi ve sellem, odgovorio je: “Veži je i osloni se na Allaha.” (Tirmizi; dobar po ocjeni Albanija)

Onaj ko ostavlja uzroke i pravda se oslanjanjem na Allaha zapravo pripada onima koji se oslanjaju na lijenost. Takav stav je pogrešan, ukazuje na nedostatak razuma i svojstvo je lijenih.

Kada su pitali imama Ahmeda, rahimehullah, o ljudima koji tvrde da su od onih koji se oslanjaju na Allaha, a kažu: “Sjedit ćemo, a naša opskrba je kod Allaha”, on je odgovorio: “Loš je to izgovor! Zar Allah nije rekao: ‘O vi koji vjerujete, kad u petak na namaz budete pozvani, požurite na spominjanje Allaha, i kupoprodaju ostavite, to vam je bolje, ako znate! A kad se namaz završi, onda se po zemlji razidite i za Allahovim dobrima tragajte i Allaha mnogo spominjite, da biste uspjeli.’ (El-Džuma, 9-10)”

Cilj nije da čovjek iscrpljuje sebe u poduzimanju uzroka i opterećuje se preko svojih mogućnosti. Dovoljno je da poduzme ono što je dostupno i ne opterećuje se, a sa čvrstom odlučnošću i oslanjanjem na Allaha sve se postiže.

Ako izgubi sve moguće uzroke, ne smije zaboraviti najvažniji i najsnažniji uzrok – dovu Uzvišenom Allahu i traženje pomoći od Njega.

Oslanjanje na druge mimo Allaha

Oslonac na druge mimo Allaha Uzvišenog dijeli se na tri vrste:

1. Oslonac u onome što je samo u Allahovoj moći, poput oslanjanja na mrtve ili tirane u određenim potrebama, kao što su pobjeda, opskrba ili zagovor. Ovo je veliki širk.



2. Oslonac u vidljivim, jasnim stvarima, poput oslanjanja na vladara ili namjesnika za ono što je u njihovoj moći, što im je Allah omogućio, kao što je materijalna korist ili sprečavanje štete. Ovo je oblik manjeg širka.
3. Oslonac i povjeravanje drugome da obavi u njegovo ime ono što on može učiniti. Ovo je dozvoljeno, ali ne treba u potpunosti ovisiti o tom drugom, već se treba osloniti na Allaha da mu olakša ono što želi postići, lično ili putem zastupnika. Ovo spada u dozvoljene uzroke, ali se na njih ne treba oslanjati, već na Uzvišenog Allaha, Koji je Stvoritelj i uzroka i posljedica.

Plodovi oslonca na Allaha

1. Rješenje svih potreba, pobjeda nad neprijateljima i trajnost blagodati sebi, porodici i djeci

Allah kaže: “O Vjerovjesniče, Allah je dovoljan tebi i vjernicima koji te slijede.” (El-Enfal, 64)

Kada je Jakub, alejhi selam, savjetovao svoje sinove kako da se zaštite, prepustio je svoj slučaj Allahu rekavši: “Vlast pripada jedino Njemu, ja se u Njega uzdam, i neka se samo u Njega uzdaju oni koji se uzdaju!” (Jusuf, 76) Uzvišeni je, također, rekao: “Onome koji se u Allaha pouzdaje, On mu je dovoljan.” (Et-Talak, 3)

Omer b. Hattab, radijallahu anhu, prenosi da je Poslanik, sallallahu alejhi ve sellem, rekao: “Kada biste se istinski pouzdali u Allaha, On bi vam davao opskrbu kao što daje pticama: ujutro odlaze veoma gladne, a predvečer se vraćaju s punim stomacima.” (Tirmizi; vjerodostojan po ocjeni Albanija)

Hafiz Ibn Redžeb, rahimehullah, rekao je: “Ovaj hadis je temelj u oslanjanju na Allaha, jer je to jedan od najvećih uzroka kojim se pribavlja opskrba. Allah Uzvišeni kaže: ‘Onome koji se u Allaha pouzdaje, On mu je dovoljan. (Et-Talak, 3)’”

2. Stjecanje Allahove ljubavi. Uzvišeni kaže: “Allah doista voli one koji se na Njega oslanjaju.” (Alu Imran, 159)
3. Ulazak u džennet bez polaganja računa. U hadisu koji prenosi Ibn Abbas, radijallahu anhu, spominje se da je Poslanik, sallallahu alejhi ve sellem, rekao: “Rečeno mi je: ‘Pogledaj prema horizontu!’, kad ono crnilo koje ispunjava horizont. Onda mi je rečeno: ‘Gledaj ovdje i ovdje na horizontima neba!’,



kad ono crnilo koje je ispunilo horizont. Zatim bi rečeno: ‘Ovo je tvoj ummet. Od njih će sedamdeset hiljada ljudi ući u džennet bez polaganja računa.’” Zatim im je Poslanik, sallallahu alejhi ve sellem, pojasnio ko su ti ljudi: “To su oni koji nisu tražili da im se uči rukja, niti su zloslutni i sujevjerni, niti se kauteriziraju,³ već se na Gospodara svoga oslanjaju i u Njega uzdaju.” (muttefekun alejhi)

4. Zaštita od šejtana. Allah Uzvišeni kaže: “Sašaptavanje je šejtanski posao, da bi rastužio one koji vjeruju, a to ne može njima nimalo nauditi, osim ako to Allah dopusti. A vjernici neka se samo u Allaha pouzdaju!” (El-Mudžadela, 10)

Prenosi se od Enesa b. Malika, radijallahu anhu, da je Poslanik, sallallahu alejhi ve sellem, rekao: “Ko rekne prilikom izlaska (iz kuće): ‘S Allahovim imenom, oslanjam se na Allaha, snaga i moć su samo u Allaha!’, rekne mu se: ‘Zaštićen si, sačuvan si’, i šejtan se od njega udalji.” (Tirmizi; vjerodostojan po ocjeni Albanija)

5. Unutrašnji mir, odlučnost za rad, dostojanstvo i blagostanje. Allah Uzvišeni kaže: “A onaj ko se u Allaha pouzda – pa Allah je, zaista, silan i mudar.” (El-Enfal, 49)

Djela koja negiraju tevekkul (oslanac na Allaha)

1. Suvjeverje i pesimizam. Poslanik, sallallahu alejhi ve sellem, upozorio je na vjerovanje u loše predznake: “Zloslutnja (tj. suvjeverje) je širk.” (Ahmed i Ebu Davud, s ispravnim lancem prenosilaca)
2. Traženje informacija o budućnosti od vračara, proroka i astrologa

Šejhul-islam Ibn Tejmijje i Ibn Kajjim el-Dževzijje spominju događaj kada je Alija b. Ebu Talib, radijallahu anhu, namjeravao krenuti u borbu protiv haridžija. Pristupio mu je astrolog i rekao: “Vođo vjernika, nemoj putovati jer je mjesec u znaku škorprije. Ako kreneš na put, tvoji će biti poraženi.” Alija, radijallahu anhu, odgovorio je: “Putovat ćemo uzdajući se u Allaha, oslanjajući se na Njega i ne vjerujući tvojim riječima.” Krenuo je na put i postigao pobjedu, porazivši skupine haridžija.

³ Stara metoda liječenja spaljivanjem rane užarenim željezom.



3. Nošenje hamajlija. Primjer su razne perle, plave oči, hamajlije koje ljudi uzimaju od šarlatana i čarobnjaka ili držanje nekih mrtvih životinja na ulazu u kuću ili u automobilu, s namjerom zaštite.

Poslanik, sallallahu alejhi ve sellem, osudio je ovakve prakse: “Ko se veže za nešto, tome će biti prepušten.” (Tirmizi i Ahmed; dobar uz druga predanja po ocjeni Albanija)

Oni koji se oslanjaju na hamajlije, umjesto na Allaha, bit će prepušteni onome u što su se uzdali, što je očit gubitak.

4. Nepoduzimanje uzroka i neulaganje truda u traženju opskrbe. Poslanik, sallallahu alejhi ve sellem, rekao je: “Da neko od vas uprti breme drva na svoja leđa, bolje je nego da od koga zatraži milostinju, dao mu je on ili ne dao.” (muttefekun alejhi)

Također je rekao: “Nema bolje hrane od one koju čovjek zaradi svojim rukama. Zaista je Allahov poslanik Davud, alejhi selam, jeo hranu koju je lično zaradio.” (Buhari)

Neulaganje truda u traženju lijeka, također, može biti jedna potkategorija ove vrste. Poslanik, sallallahu alejhi ve sellem, naredio je liječenje rekavši: “Liječite se, robovi Allahovi.” (Tirmizi; vjerodostojan po ocjeni Albanija)

Isto tako je kazao: “Allah nije dao bolest a da za nju nije dao i lijek.” (Buhari)

Primjeri oslanjanja na Allaha

1. Poslanik, sallallahu alejhi ve sellem, u pećini

Ebu Bekr, radijallahu anhu, prenosi: “Rekao sam Poslaniku, sallallahu alejhi ve sellem, dok smo bili u pećini: ‘Kad bi neko od njih pogledao ispod svojih nogu, vidio bi nas.’ On reče: ‘Šta misliš, Ebu Bekre, o dvojici s kojima je Allah treći?’” (muttefekun alejhi)

2. Žena i njene koze

Poslanik, sallallahu alejhi ve sellem, pričao je o ženi koja je izašla u vojnu ekspediciju ostavivši dvanaest koza i vreteno kojim je prela. Kada je izgubila jednu kozu i vreteno, uputila je dovu: “Gospodaru, Ti si obećao onome ko izađe na Tvom putu da ćeš ga sačuvati. Ja sam izgubila jednu svoju kozu i vreteno. Molim Te da mi ih vratiš.” Poslanik, sallallahu alejhi ve sellem, spomenuo je njenu upornost u dovi, pa je ujutro zatekla svoju kozu i još jednu sličnu njoj, kao i svoje vreteno i još jedno slično njemu. (Ahmed; vjerodostojan po ocjeni Albanija)

SADRŽAJ

Predgovor.....	4
Uvod.....	6

PREDAVANJE BR. 1

Djela srca	7
Rezime	9

PREDAVANJE BR. 2

Iskrenost (<i>ihlas</i>)	10
Jezička definicija iskrenosti	10
Šerijatskoterminološka definicija iskrenosti	10
Iskrenost je uvjet primanja djela	10
Važnost nijeta / namjere	11
Plodovi iskrenosti	11
Posljedice izostajanja iskrenosti	12

PREDAVANJE BR. 3

Znaci iskrenosti	13
Spajanje dunjalučkih koristi s ibadetima.....	13
Rija' (pretvaranje)	14
Djela za koja se misli da su pretvaranje (rija'), a nisu	15
Kada je pokazivanje i isticanje djela dozvoljeno, a kada nije?	15

PREDAVANJE BR. 4

Bogobožnost (<i>takva</i>)	17
Jezička i terminološka definicija	17
Oporučivanje bogobožnosti.....	18
Bogobožnost je put ka Allahovoj blizini	18
Upozorenje	19



PREDAVANJE BR. 5

Stepeni bogobožnosti	20
Osobine bogobožnih	21
Put ka izgradnji bogobožnosti.....	21
Plodovi bogobožnosti	22
Najveći plodovi bogobožnosti	22

PREDAVANJE BR. 6

Strah (<i>hauf</i>)	25
Jezička definicija.....	25
Šerijatskoterminološka definicija	25
Strahopoštovanje (<i>hašje</i>).....	25
Obaveznost straha od Allaha	26
Položaj straha.....	26
Kategorije ljudi shodno stepenu straha od Allaha.....	27

PREDAVANJE BR. 7

Vrste straha.....	28
Plodovi straha od Uzvišenog Allaha	29
Uzroci koji pobuđuju strah od Allaha	30

PREDAVANJE BR. 8

Nada (<i>redža</i>)	32
Jezička definicija.....	32
Šerijatskoterminološka definicija	32
Razlika između nade i želje	32
Plodovi nade	33
Uzroci ostvarenja nade.....	33
Vjernik je između straha i nade	34

PREDAVANJE BR. 9

Ljubav (<i>mehabbet</i>)	37
Jezička definicija.....	37



Šerijatskoterminološka definicija	37
Pravni status ljubavi prema Allahu Uzvišenom	37
Razlozi Allahove ljubavi prema robu i ljubavi roba prema Allahu Uzvišenom	38
Znaci ljubavi prema Allahu Uzvišenom	39
Plodovi ljubavi prema Allahu Uzvišenom	39

PREDAVANJE BR. 10

Strpljenje (<i>sabr</i>)	41
Jezička definicija	41
Šerijatskoterminološka definicija	41
Šerijatskopravni status strpljenja	41
Položaj strpljenja	42

PREDAVANJE BR. 11

Vrste strpljenja	44
Plodovi strpljenja	45

PREDAVANJE BR. 12

Zahvalnost (<i>šukr</i>)	47
Jezička definicija	47
Šerijatskoterminološka definicija	47
Razlika između hvale (<i>hamda</i>) i zahvalnosti (<i>šukra</i>)	48
Šerijatskopravni status zahvalnosti	48
Šerijatski propis nezahvalnosti na Allahovim blagodatima	49
Šerijatski propis zahvalnosti ljudima	49
Prakse koje potiču zahvalnost	50
Plodovi zahvalnosti	51
Strpljenje i zahvalnost	51

PREDAVANJE BR. 13

Opreznost u vjeri (<i>vera'</i>)	52
Jezička definicija	52
Šerijatskoterminološka definicija	52



Temelji opreznosti u vjeri	52
Značaj opreznosti u vjeri	53
Ebu Bekr es-Siddik i njegova opreznost u vjeri.....	54
Opreznost u vjeri najbolji je podsticaj u obožavanju Allaha.....	54
Razlika između asketizma (<i>zuhda</i>) i opreznosti u vjeri (<i>vera'a</i>).....	54
Opasnost neopreznosti u vjeri.....	55
Veza znanja i opreznosti u vjeri	55
Primjeri opreznosti u vjeri	56
Uzroci dostizanja stepena opreznosti u vjeri	56

PREDAVANJE BR. 14

Zadovoljstvo (<i>rida</i>)	57
Jezička definicija.....	57
Šerijatskoterminološka definicija	57
Stepeni zadovoljstva.....	57
Obaveznost zadovoljstva Allahom i sudbinom.....	57
Zadovoljstvo Allahom kao gospodarom.....	58
Zadovoljstvo islamom kao vjerom.....	58
Zadovoljstvo Muhammedom, sallallahu alejhi ve sellem, kao poslanikom	59
Zadovoljstvo Allahovom odredbom.....	59
Djela koja nisu oprečna zadovoljstvu Allahovom odredbom	59
Uvjeti dostizanja stepena zadovoljstva	60
Plodovi zadovoljstva	61

PREDAVANJE BR. 15

Razmišljanje (<i>tefekkur</i>)	63
Jezička definicija.....	63
Šerijatskoterminološka definicija	63
Najkorisnije razmišljanje.....	63
Područja razmišljanja.....	64
Granice razmišljanja i zone opreza.....	66
Praksa dobrih predaka u razmišljanju	66
Vrijednost razmišljanja.....	68



Sredstva postizanja ispravnog razmišljanja	68
--	----

PREDAVANJE BR. 16

Samoobračun (muhasaba).....	69
Jezička i šerijatskoterminološka definicija.....	69
Samoobračun u Kur'anu i sunnetu	69
Vrste samoobračuna	70
Plodovi samoobračuna	71
Primjeri samoobračuna kod pravednih prethodnika	72

PREDAVANJE BR. 17

Oslanjanje na Allaha (<i>tevekkul</i>).....	73
Jezička definicija.....	73
Šerijatskoterminološka definicija	73
Stepen oslonca na Allaha u vjeri	74
Bez oslonca nema imana	74
Izreka "Dovoljan nam je Allah, divan li je On zaštitnik"	74
Značaj poduzimanja uzroka	75
Oslanjanje na druge mimo Allaha	75
Plodovi oslonca na Allaha	76
Djela koja negiraju tevekkul (oslanac na Allaha)	77
Primjeri oslanjanja na Allaha.....	78